


剛
利
卅



傳卷第一

元史百十四

翰林學士中書知制誥兼修國史 吳漁翰符製真高知制誥兼國史院編修官 稽奉

勅

后妃一

太祖光獻翼聖皇后名旭真弘吉刺氏特薛禪之女也特薛禪與子按陳從太祖征伐有功賜號國舅封王爵以統其部族有旨生女為后生男尚公主世世不絕世祖至元二年十二月追謚光獻翼聖皇后冊文曰尊祖宗致誠孝寔王政之攸先法天地建鴻名亦母儀之克稱肆先虔於太室庸昭示於後昆體茲



至公節以大惠欽惟光獻皇后宅心淵靜稟德柔嘉當聖神創業之初有夙夜求賢之助功施社稷垂慈訓於景襄慶衍宮闈流徽音於莊聖協贊龍飛之運永詒燕翼之謀惟周人著稱思齊亦推本興王之迹在漢世始謚光烈蓋薦申追遠之情是用稽迪舊章增崇遺美謹遣攝太尉某奉玉冊玉寶加上尊謚曰光獻翼聖皇后伏惟淑靈降格典禮備膺於億萬年茂隆丕祚升祔太祖廟其餘后妃有四幹耳朶四十餘人不記氏族其名悉見于表後皆倣此

太宗昭慈皇后名脫列哥那乃馬真氏生定宗歲辛丑十一月太宗崩后稱制攝國者五年丙午會諸王百官議立定宗朝政多出於后至元二年崩追謚昭慈皇后升祔太宗廟

定宗欽淑皇后名幹兀立海迷失定宗崩后抱子失列門垂簾聽政者六月至元二年追謚欽淑皇后憲宗貞節皇后名忽都台弘吉刺氏特薛禪孫忙哥陳之女也蚤崩后妹也速兒繼爲妃至元二年追謚貞節皇后升祔憲宗廟

世祖昭睿順聖皇后名察必弘吉刺氏濟寧忠武王按陳之女也生裕宗中統初立爲皇后至元十年三

月授冊寶上尊號貞懿昭聖順天睿文光應皇后一日四怯薛官奏割京城外近地牧馬帝既允方以圖進后至帝前將諫先陽責太保劉秉忠曰汝漢人聰明者言則帝聽汝何爲不諫向初到定都時若以地牧馬則可今軍餼俱分業已定奪之可乎帝默然命寢其事後嘗於太府監支繒帛表裏各一帝謂后曰此軍國所需非私家物后何可得支后自是率宮人親執女工拘諸舊弓絃練之緝爲紬以爲衣其勅密比綾綺宣徽院羊膻皮置不用后取之合縫爲地毯其勤儉有節而無棄物類如此十三年平宋幼主朝于上都大宴衆皆歡甚唯后不樂帝曰我今平江南自此不用兵甲衆人皆喜爾獨不樂何耶后跪奏曰妾聞自古無千歲之國母使吾子孫及此則幸矣帝以宋府庫故物各聚置殿庭上召后視之后徧視即去帝遣宦者追問后欲何所取后曰宋人貯蓄以遺其子孫子孫不能守而歸於我我何忍取一物耶時宋太后全氏至京不習北方風土后爲奏令回江南帝不允至三奏帝乃荅曰爾婦人無遠慮若使之南還或浮言一動即廢其家非所以愛之也苟能愛之時加存卹使之便安可也后退益厚待之胡帽舊無

前簷帝因射日色炫目以語后后即益前簷帝大喜遂命爲式又製一衣前有裳無衽後長倍於前亦無領袖綴以兩襜名曰比甲以便弓馬時皆倣之后性明敏達於事機國家初政左右匡正當時與有力焉十四年二月崩三十一年成宗即位五月追謚昭睿順聖皇后其冊文曰奉先思孝臣子之至情節惠易名古今之大典惟殷娥有明德之號而周任著思齊之稱爰考舊章式崇尊謚恭惟先皇后厚德載物正位承天隆內治於公宮綱大倫於天下曩事龍潛之邸及乘虎變之秋鄂渚班師洞識事機之會上都殿

祚居多輔佐之謀先物之明獨斷于衷進賢之志允叶于上左右我聖祖建帝王之極功撫育我前人嗣社稷之重託臣下之勤勞灼見生民之疾苦周知儼宸極二十年垂慈範千萬世惟全美聖而益聖宜顯冊書而屢書不勝惓惓懇懇之誠敬展尊尊親親之義以揚盛烈以對耿光謹遣某官某奉玉冊玉寶上尊謚曰昭睿順聖皇后欽惟淑靈在天明鑒逮下增輝煒管茂揚徽懿之音合饗太宮益衍壽昌之福升祔世祖廟

南必皇后弘吉刺氏納陳孫仙童之女也至元二十

年納爲皇后繼守正宮時世祖春秋高頗預政相臣常不得見帝輒因后奏事焉有子一人名鐵蔑赤成宗貞慈靜懿皇后名失憐荅里弘吉刺氏幹羅陳之女也大德三年十月立爲后生皇子德壽早薨武宗至大三年十月追尊謚貞慈靜懿皇后其冊文曰宗祧定位象天地之有陰陽今古同符通幽明以行典禮哀榮斯備孝敬兼陳恭惟先元妃弘吉刺氏慶毓仙源德昭彤史春宮主饋共瞻采翟之輝椒掖正名莫際飛龍之會惟貞協在中之美而慈推成物之仁靜既合夫坤元懿益彰於壺則雖小星之逮下豈

衆曜之敢齊嗣服云初追懷曷已是用究成先志式闡徽稱謹遣某官某上尊謚曰貞慈靜懿皇后升祔於成宗皇帝殿室伏惟淑靈永伸配侑介以景福佑我無疆

卜魯罕皇后伯岳吾氏駙馬脫里思之女元貞初立爲皇后大德三年十月授冊寶成宗多疾后居中用事信任相臣哈刺哈孫大德之政人稱平允皆后處決京師初建萬寧寺中塑祕密佛像其形醜恠后以手帕蒙覆其面尋傳旨毀之省院臺臣奏上尊號帝不允車駕幸上都后方自奏請帝曰我病日久國家

大事多廢不舉尚寧理此等事耶事遂寢大德十年
后嘗謀貶順宗妃荅吉與其子仁宗往懷州明年成
宗崩時武宗在北邊恐其歸必報前然后乃命取安
西王阿難荅失里來京師謀立之仁宗自懷州入清
宮禁既誅安西王并構后以私通事出居東安州
武宗宣慈惠聖皇后名真哥弘吉刺氏脫憐子遂不
刺之女至大三年四月冊爲皇后其文曰乾爲天坤
爲地四時由是以相成日宗陽月宗陰萬象以之而
並著后職有關於世教先猷具載於邦彛惟慈旨之
親承亦僉言之允若咨尔皇后弘吉刺氏睿聰淑哲
端懿誠莊寶婺分輝源天潢之自出纓徽迪慶系統
組以相仍後逸皇慶二年立長秋寺掌皇子宫政秩
三品泰定四年十一月崩上尊謚曰宣慈惠聖皇后
升祔武宗廟

速哥失里皇后按陳哈兒只之女真哥皇后之從妹
也妃二人亦乞烈氏奴兀倫公主之女寔生明宗天
曆二年追謚仁獻章聖皇后唐兀氏生文宗天曆二
年追謚文獻昭聖皇后
仁宗莊懿慈聖皇后名阿納失失里弘吉刺氏生英
宗皇慶二年三月冊爲皇后上冊寶遣官祭告天地

於南郊及太廟改典內院爲中政院秩正二品英宗即位上尊號皇太后其冊文曰坤承乾德所以著兩儀之稱母統父尊所以崇一體之號故因親而立愛宜考禮以正名恭惟聖母溫慈惠和淑哲端懿上以奉宗祏之重下以叙倫紀之常恢王化于二南嗣徽音於三母輔佐先考憂勤警戒之慮深擁佑眇躬撫育提携之恩至迨于今日紹我不基規摹一出於慈闈付托益彰於祖訓致天下之養以爲樂未足盡於孝心極域中之大以爲尊庶可稱其懿美式遵貴貴之義用罄親親之情謹遣某官某奉冊上尊號曰皇太后伏惟周宗繇繇長信

穆穆備洛書之錫福繫坤極之儀天啓佑後人永錫胤祚明日受百官朝賀于興聖宮至治二年崩上謚莊懿慈聖皇后其冊文曰致孝所以揚親易名所以表行矧爲天下母而養弗逮履天子位而報則豐曷勝孺慕之心必盡欽崇之禮欽惟先皇太后夙明壺則克嗣德音輔佐先朝有恭儉節用之實誕育眇質有劬勞顧復之恩九族咸育於仁四海仰遵其化昊天不弔景命靡融愴聖善之長違念風猷之未泯是用揄揚于彤史正宜敷繹于寶慈爰據彝經追嚴徽號謹遣攝太尉某官某奉玉冊玉寶上尊號曰莊懿

元史傳卷一
七
慈聖皇后伏惟淑靈如在合饗太宮鑒格孔昭膺茲
鉅典陰相丕祚億萬斯年并祔仁宗廟

英宗莊靜懿聖皇后名速哥八刺亦答烈氏昌國公
主益里海涯女也至治元年冊爲皇后泰定四年六
月崩謚曰莊靜懿聖皇后

泰定帝八不罕皇后弘吉刺氏按陳孫幹留察兒之
女泰定元年冊爲皇后

妃二人一曰必罕一曰速哥答里皆弘吉刺氏宛王
買住罕之女也文宗天曆初俱安置東安州

明宗貞裕徽聖皇后名邁來迪生順帝而崩文宗立
謚貞裕徽聖皇后

八不沙皇后成宗甥壽寧公主之女也侍明宗潛邸

生寧宗天曆二年立寧徽寺堂明宗皇后宮事以鈔
萬錠幣帛二千疋供后宮費用十一月后請爲明宗

資冥福命帝師率諸僧作佛事七日于大天源延聖
寺道中建醮于玉虛天寶太乙萬壽四宮及武當龍

虎二山至順元年勅有司供明宗后宮幣帛二百疋
是年四月崩百則顯聖寺

文宗卜答失里皇后弘吉刺氏父駙馬魯王瑁阿不
刺母魯國公主桑哥吉刺文宗居建業后亦在行天

曆元年文宗即位立爲皇后二年授冊寶十一月后以銀五萬兩助建大承天護聖寺至順元年以籍沒張瑄家田四百頃賜護聖寺爲永業后與宦者拜住謀殺明宗后八不沙三年八月文宗崩于上都后導馭末命申帝初志遂立明宗次子懿璘質班是爲寧宗十一月奉玉冊玉寶尊皇后爲皇太后十二月御興聖殿受朝賀寧宗崩大臣請立太子燕帖古思后曰天位至重吾子尚幼明宗長子妥懽帖睦爾在廣西今十三歲矣理當立之於是奉旨迎至京師以明年六月即位是爲順帝元統元年尊爲太皇太后仍稱制臨朝至元六年六月詔去尊號安置東安州尋崩寧宗答里也忒迷失皇后弘吉刺氏至順三年十月立爲后至正二十八年崩升祔寧宗廟

順帝答納失里皇后欽察氏太師太平王燕鐵木兒之女至順四年立爲后元統二年授冊寶其冊文曰天之元統二氣配莫厚於坤儀月之道循右行明同貞於乾曜若昔帝王之宅后居多輔相之世勲蓋選德於亢宗亦疇庸於先正造周資任妣之化興漢表馬鄧之功咨尔皇后欽察氏雍肅惠慈謙裕靜淑迺祖廼父夙堅翼亮之心于國于家實獲修齊之助朕

續丕圖之初載親承太后之睿謨眷我元臣簡茲碩媛
相嚴禋而率典奉慈極以愉顏用彰禕翟之華式著旂
常之舊令攝太尉某官授以玉冊寶章命爾爲皇后備
成嘉禮宏賁大猷於戲嵩高生賢予篤懷于良佐關
睢正始爾勉嗣於徽音永錫壽康昭示悠久三年后兄御
史大夫唐其勢以謀逆誅弟塔刺海走匿后官后以衣
蔽之因遷后出官丞相伯顏鳩后于開平民舍

伯顏忽都皇后弘吉刺氏宣慈惠聖皇后真哥姪毓
德王孛羅帖木兒之女也至元三年二月立爲皇后
其冊文曰帝王之道齊其家而天下平風教所基正

乎位而人倫厚爰擇配以承宗事若稽古以率典常
咨尔弘吉刺氏淑哲温恭齊莊貞一屬選賢於中壺
躬受命於慈闈勗帥來嬪蹈桀儀之有度動容中禮
謹夙夜以無違茲表式於宮庭宜推崇其位號乃蠲
吉旦庸舉彝章遣攝太尉某持節授以玉冊寶章命
爾爲皇后於戲乾施坤承克順成於四序日明月儼
久照臨於萬方朕欲躋世於乂安爾其助予之德化
共御亨嘉之運益延昌熾之期勉爾徽音聿修內治
生皇子真金二歲而天后性節儉不妬忌動以禮法
自持第三皇后竒氏素有寵居興聖西宮帝希幸東

內后左右以爲言后無幾微怨望意從帝時巡上京
次中道帝遣內官傳旨欲臨幸后辭曰暮夜非至尊
往來之時內官往復者三竟拒不納帝益賢之帝嘗
問后中政院所支錢糧皆傳汝旨汝還記之否后對
曰妾當用則支關防出入必已選人司之妾豈能盡
記耶居坤德殿終日端坐未嘗妄踰戶闥至正二十
五年八月崩年四十二竒氏后見其所遺衣服弊壞
大笑曰正宮皇后何至服此等衣耶其樸素可知踰
月皇太子自奠寧歸哭之甚哀

完者忽都皇后竒氏高麗人生皇太子愛猷識理達

騰家微用后貴三世皆追封王爵初徽政院使禿滿
迭兒進爲宮女主供茗飲以事順帝后性頗黠日見
寵幸後答納失里皇后方驕妬數箠辱之答納失里
既遇害帝欲立之丞相伯顏爭不可伯顏罷相沙刺
班遂請立爲第二皇后居興聖宮改徽政院爲資正
院后無事則取女孝經史書訪問歷代皇后之有賢
行者爲法四方貢獻或有珍味輒先遣使薦太廟然
後敢食至正十八年京城大飢后命官爲粥食之又
出金銀粟帛命資正院使朴不花於京都十一門置
冢葬死者遺骸十餘萬後命僧建水陸大會度之時

帝頗怠於政治后與皇太子愛猷識理達臘遽謀內
禪遣朴不花諭意丞相太平太平不答復召太平至
宮舉酒賜之自申前請太平依違而已由是后與太
子嚙之而帝亦知后意怒而疏之兩月不見朴不花
因后而寵幸既被劾黜后調御史大夫佛家奴爲之
辯明佛家奴乃謀再劾朴不花后知之反嗾御史劾
佛家奴謫居潮河初竒氏之族在高麗者怙勢驕橫
高麗王怒盡殺之二十三年后謂皇太子曰汝何不
爲我復讎耶遂立高麗王族人留京師者爲王以竒
族之子三寶奴爲元子遣同知樞密院事崔帖木兒

爲丞相用兵一萬并招倭兵共往納之過鴨綠水伏
兵四起乃大敗餘十七騎而還后大慚二十四年七
月孛羅帖木兒稱兵犯闕皇太子出奔奠寧下令討
孛羅帖木兒孛羅帖木兒怒嗾監察御史武起宗言
后外撓國政奏帝宜遷后出于外帝不答二十五年
三月遂矯制幽于諸色總管府令其黨姚伯顏不花
守之四月庚寅孛羅帖木兒逼后還宮取印章僞爲
后書召太子后仍回幽所後又數納美女於孛羅帖
木兒至百日始還宮及孛羅帖木兒死召皇太子還
京師后傳旨令廓擴帖木兒以兵擁皇太子入城欲

脅帝禪位廓擴帖木兒知其意至京城三十里外即遣軍還營皇太子復銜之事見擴廓帖木兒傳會伯顏忽都皇后崩十二月中書省臣奏言后宜正位中宮帝不荅又奏改資正院為崇政院而中政院亦兼主之帝乃授之冊寶其冊文曰坤以承乾元人道莫先於夫婦后以母天下王化實始於家邦典禮之常古今攸重咨爾肅良合氏篤生名族來事朕躬儆戒相成每勤於夙夜恭儉率下多歷於歲年既發祥元子於儲闈復流慶孫枝於甲觀眷若中宮之位允宜配之賢宗戚大臣况僉亡而敷請掖庭諸御咸傾望以推尊乃屢遜辭尤可嘉尚今遣攝太尉某持節授以玉冊玉寶命爾為皇后於戲慎修壺政益勉爾輔佐之心昭嗣徽音同保我延洪之福其欽寵命以衍壽祺二十八年從帝北奔

傳卷第一

嘉靖十年補刊

列傳卷第三

元史一百一十五

翰林學士華大夫知制誥兼修國史臣宋濂翰林待制承直郎同知制誥兼國史院編修官呈禕等奉勅修

睿宗

睿宗景襄皇帝諱拖雷太祖第四子太宗母弟也方太祖崩時太宗留霍博之地國事無所屬拖雷實身任之聞燕京盜賊白晝剽掠富民財物吏不能禁遂遣塔察吾圖撒合里往窮治之殺十有六人盜始屏息己丑夏太宗還京八月即位明年庚寅秋太宗伐金命拖雷帥師以從破天城堡拔蒲城縣聞金平章

合達叅政蒲阿守西邊遂渡河攻鳳翔會前兵戰不利從太宗援之合達乃退辛卯春破洛陽河中諸城太宗還宮山大會諸侯王謂曰人言耗國家者實由寇敵今金未殄實我敵也諸君寧無計乎拖雷進曰臣有愚計非衆可聞太宗屏左右亟臨問之其言秘人莫知也鳳翔既下有降人李昌國者言金主遷汴所恃者黃河潼關之險爾若出寶雞入漢中不一月可達唐鄧金人聞之寧不謂我師從天而下乎拖雷然之言於太宗太宗大喜語諸王大臣曰昔太祖嘗有志此舉今拖雷能言之真賽因也賽因猶華言大

好云遂大發兵太宗以中軍自碗子城南下渡河由洛陽進韓陳那顏以左軍由濟南進而拖雷總右軍自鳳翔渡渭水過寶雞入小潼關涉宋人之境沁水而下期以明年春俱會于汴遣搠不罕詣宋假道且約合兵宋殺使者拖雷大怒曰彼昔遣苟夢玉來通好遽自食言背盟乎乃分兵攻宋諸城堡長驅入漢中進襲四川陷閬州過南部而還遂由金取房前鋒三千人破金兵十餘萬于武當山趨均州乘騎浮渡漢水遣夔曲涅率千騎馳白太宗太宗方詣漢水將分兵應之會夔曲涅至即遣慰諭拖雷亟合兵焉

拖雷既渡漢金大將合達設伏二十餘萬于鄧州之西據隘待之時拖雷兵不滿四萬及得謀報乃悉留輜重輕騎以進十二月丙子及金人戰于禹山佯北以誘之金人不動拖雷晝夜行金合達聞其且至退保鄧州攻之三日不下遂將而北以三千騎命札刺等率之爲殿明旦大霧迷道爲金人所襲殺傷相當拖雷以札刺失律罷之而以野里知給歹代焉未幾敗金軍壬辰春合達等知拖雷已北合步騎十五萬躡其後拖雷按兵遣其將忽都忽等誘之日且暮令軍中曰毋令彼得休息宜夜鼓譟以擾之太宗時

亦渡河遣親王口溫不花等將萬餘騎來會天大雨雪金人僵凍無人色幾不能軍拖雷即欲擊之諸將請俟太宗至破之未晚拖雷曰機不可失彼脫入城未易圖也况大敵在前敢以遺君父乎遂奮擊于三峯山大破之追奔數十里流血被道資仗委積金之精銳盡於此矣餘衆迸走睢州伏兵起又敗之合達走鈞州僅遺數百騎蒲阿走汴至望京橋復禽獲之太宗尋至按行戰地頌謂拖雷曰微汝不能致此捷也諸侯王進曰誠如聖諭然拖雷之功著在社稷盖又指其定冊云爾拖雷從容對曰臣何功之有此天

之威皇帝之福也聞者服其不伐從太宗攻鈞州拔
之獲合達攻許州又拔之遂從太宗收定河南諸郡
四月由半渡入真定過中都出北口住夏于官山五
月太宗不豫六月疾甚拖雷禱于天地請以身代之
又取巫覡祓除釁滌之水飲焉居數日太宗疾愈拖
雷從之北還至阿刺合的思之地遇疾而薨壽四十
有闕妃怯烈氏子十一人長憲宗次四則世祖也憲
宗立追謚曰英武皇帝廟號睿宗二年合祭昊天后
土以太祖睿宗配享世祖至元二年改謚景襄皇帝

裕宗

裕宗文惠明孝皇帝諱真金世祖嫡子也母昭睿順
聖皇后弘吉烈氏少從姚樞竇默受孝經及終卷世
祖大悅設食饗樞等中統三年封燕王守中書令丞
相史天倪入啓事王曰我幼未嘗習祖宗典則閑於
政體一旦當大任惟汝耆德賴焉復諭贊善王恂曰
省臣所啓等國事也爾宜入與聞之四年兼判樞密
院事至元初省臣奏請王署勅每月必再至中書於
是王將入中書乳母進新衣笑却之曰吾何事美觀
也嘗從幸宜興世祖違豫憂形于色夕不能寐聞母
皇后暴得風疾即悲泣衣不及帶而行七年秋受詔

巡撫稱海至冬還京間謂諸王札刺忽及從官伯顏等曰吾屬適有茲暇宜各悉乃心慎言所守俾吾聞之於是撒里蠻曰太祖有訓欲治身先治心欲責人先責己伯顏曰皇上有訓欺罔盜竊人之至惡一爲欺罔則後雖出善言人終弗信一爲盜竊則事雖未覺心常惴惴若捕者將至札刺忽曰我祖有訓長者稍深者底蓋言貴有終始長必極其抄深必究其底不可中輟也王曰皇上有訓毋持大心大心一持事即隳敗吾觀孔子之語即與聖訓合也至王恂陳說尤多事見恂傳十年二月立爲皇太子仍兼中書令

判樞密院事受玉冊皇帝若曰咨爾皇太子真金仰惟太祖皇帝遺訓嫡子中有克嗣服繼統者豫選定之是用立太宗英文皇帝以紹隆丕構自時厥後爲不顯立冢嫡遂啓爭端朕上遵祖宗宏規下協昆弟僉同之議乃從燕邸即立爾爲皇太子積有日矣比者儒臣敷奏國家定立儲嗣宜有冊命此典禮也今遣攝太尉左丞相伯顏持節授爾玉冊金寶於戲聖武燕謀爾其承奉昆弟宗親爾其和協使仁孝顯于躬行抑可謂不負所托矣尚其戒哉勿替朕命九月丙戌詔立宮師府設官屬三十有八負起處士楊恭

懿于京兆太子嘗有疾世祖臨幸親和藥以賜之遣侍臣李衆馳祀嶽瀆名山川太子戒其所至郡邑毋煩吏迎送重擾民也詔以侍衛親軍萬人益隸東宮太子命王慶端董士亨選其驍勇者教以兵法時閱試焉太子服綾袷爲潘所漬命侍臣重加染治侍臣請織綾更製之太子曰吾欲織百端非難也願是物未敝豈宜棄之東宮香殿成工請鑿石爲池如曲水流觴故事太子曰古有肉林酒池爾欲吾效之耶不許每與諸王近臣習射之暇輒講論經典若資治通鑑貞觀政要王恂許衡所述遠金帝王行事要畧下

至武經等書從容片言之間苟有允愜未嘗不爲之洒然改容時侍經幄者如王恂白棟皆朝夕不出東宮而待制李謙太常宋衡尤加咨訪蓋無間也十八年正月昭睿順聖皇后崩太子自獵所奔赴勺飲不入口者終日設廬帳居之命宋衡擇可備顧問者衡以郭祐何瑋徐琰馬紹揚居寬何榮祖楊仁風等爲言太子曰是數人者盡爲我致之宜自近者始遂召瑋于易州琰于東平贊善王恂卒太子聞之嗟悼賻鈔二千五百緡一日頽謂左右曰王贊善當言必言未嘗頽惜隨事規正良多裨補今鮮有其匹也時阿

巡撫稱海至冬還京間謂諸王札刺忽及從官伯顏
等曰吾屬適有茲暇宜各悉乃心慎言所守俾吾聞
之於是撒里蠻曰太祖有訓欲治身先治心欲責人
先責己伯顏曰皇上有訓欺罔盜竊人之至惡一爲
欺罔則後雖出善言人終弗信一爲盜竊則事雖未
覺心常惴惴若捕者將至札刺忽曰我祖有訓長者
稍深者底蓋言貴有終始長必極其抄深必究其底
不可中輟也王曰皇上有訓毋持大心大心一持事
即隳敗吾觀孔子之語即與聖訓合也至王恂陳說
尤多事見恂傳十年二月立爲皇太子仍兼中書令
判樞密院事受玉冊皇帝若曰咨爾皇太子真金仰
惟太祖皇帝遺訓嫡子中有克嗣服繼統者豫選定
之是用立太宗英文皇帝以紹隆丕構自時厥後爲
不顯立冢嫡遂啓爭端朕上遵祖宗宏規下協昆弟
僉同之議乃從燕邸即立爾爲皇太子積有日矣此
者儒臣敷奏國家定立儲嗣宜有冊命此典禮也今
遣攝太尉左丞相伯顏持節授爾玉冊金寶於戲聖
武燕謀爾其承奉昆弟宗親爾其和協使仁孝顯于
躬行抑可謂不負所托矣尚其戒哉勿替朕命九月
丙戌詔立宮師府設官屬三十有八負起處士楊恭

懿于京兆太子嘗有疾世祖臨幸親和藥以賜之遣侍臣李衆馳祀嶽瀆名山川太子戒其所至郡邑毋煩吏迎送重擾民也詔以侍衛親軍萬人益隸東宮太子命王慶端董士亨選其驍勇者教以兵法時閱試焉太子服綾袷爲潘所漬命侍臣重加染治侍臣請織綾更製之太子曰吾欲織百端非難也頽是物未敝豈宜棄之東宮香殿成工請鑿石爲池如曲水流觴故事太子曰古有肉林酒池爾欲吾效之耶不許每與諸王近臣習射之暇輒講論經典若資治通鑑貞觀政要王恂許衡所述遼金帝王行事要畧下

至武經等書從容片言之間苟有允愜未嘗不爲之洒然改容時侍經幄者如王恂白棟皆朝夕不出東宮而待制李謙太常宋衡尤加咨訪蓋無間也十八年正月昭睿順聖皇后崩太子自獵所奔赴勺飲不入口者終日設廬帳居之命宋衡擇可備顧問者衡以郭祐何瑋徐琰馬紹揚居寬何榮祖楊仁風等爲言太子曰是數人者盡爲我致之宜自近者始遂召瑋于易州琰于東平贊善王恂卒太子聞之嗟悼賻鈔二千五百緡一日頽謂左右曰王贊善當言必言未嘗頽惜隨事規正良多裨補今鮮有其匹也時阿

合馬擅國重柄太子惡其姦惡未嘗少假顏色盜知
阿合馬所畏憚者獨太子爾因爲僞太子夜入京城
召而殺之及和禮霍孫入相太子曰阿合馬死於盜
手汝任中書誠有便國利民者毋憚更張苟或沮撓
我當力持之中書啓以何瑋叅議省事徐琰爲左司
郎中瑋琰入見太子諭之曰汝等學孔子之道今始
得行宜盡平生所學力行之辟楊仁風于潞州馬紹
于東平復辟楊恭懿置省中議事以衛輝總管董文
用練達官政與恭懿同置省中按察副使王憚進承
華事畧一曰廣孝二曰立愛三曰端本四曰進學五

曰擇術六曰謹習七曰聽政八曰達聰九曰撫軍十
曰明分十一曰崇儒十二曰親賢十三曰去邪十四
曰納誨十五曰幾諫十六曰從諫十七曰推恩十八
曰尚儉十九曰戒逸二十曰審官太子聞漢成帝不
絕馳道唐肅宗改絳紗袍爲朱明服大喜曰使吾行
之亦當若此及說邢峙止齋太子食邪蒿顧宮臣曰
菜名邪蒿未必果邪也雖食之豈遽使人不正邪張
九思對曰古人設戒義固當爾詔割江西龍興路爲
太子分地太子謂左右曰安得治民如邢州張耕者
乎誠使之往治俾江南諸郡取法民必安集於是召

宋衛大選署守長江西行省以歲課羨餘鈔四十七萬緡獻太子怒曰朝廷令汝等安治百姓百姓安錢糧何患不足百姓不安錢糧雖多安能自奉乎盡卻之阿里以民官兼課司請歲附輸羊三百太子以其越例罷之叅政劉思敬遣其弟思恭以新民百六十戶來獻太子問民所從來對曰思敬征重慶時所俘獲者太子蹙然曰歸語汝兄此屬宜隨所在放遣爲民毋重失人心烏蒙宣撫司進馬踰歲獻之額即諭之曰去歲嘗俾勿多進馬恐道路所經數勞吾民也自今其勿復然二十年春辟劉因于保定因以疾辭

固辟之乃至拜右贊善大夫以吏部郎中夾谷之竒爲左贊善大夫是時已立國子學李棟宋衛李謙皆以東宮僚友繼典教事至是命因專領之而以衛等仍備咨訪嘗曰吾聞金章宗時有司論太學生廩費大多章宗謂養出一范文正公所償顧豈少哉其言甚善會因復以疾乞去二十二年以長史耶律有尚爲國子司業中庶子伯必以其子阿八赤入見諭令入學伯必即令其子入蒙古學逾年又見太子問讀何書其子以蒙古書對太子曰我命汝學漢人文字耳其亟入胄監遣使辟宋工部侍郎倪堅于開元旣

至訪以古今成敗得失堅對言三代得天下以仁其
失也以不仁漢唐之亡也以外戚閹豎宋之亡也以
姦黨權臣太子嘉納賜酒日昃乃罷諭德李謙夾谷
之竒嘗進言曰殿下睿性夙成閱理久熟方遵聖訓
叅決庶務如視膳問安之禮固無待於贊諭至於軍
民之利病政令之得失事關朝廷責在臺院有非宮
臣所宜言者獨有澄原固本保守成業殿下所當留
心臣等不容緘口者也敬陳十事曰正心曰睦親曰
崇儉曰親賢曰幾諫曰戢兵曰尚文曰定律曰正名
曰革敝其論正心有云太子之心天下之本也太子

心正則天心有所屬人心有所繫矣唐太宗嘗言人
主一心攻之者衆或以勇力或以辨口或以詭譎或
以姦詐或以嗜欲輻湊攻之各求自售人主少懈而
受其一則其害有不可勝言者殿下至尊之儲貳入
求自售者亦不爲少須常喚醒此心不使爲物欲所
撓則宗社生靈之福固本澄原莫此爲切論睦親以
宗親爲王室之藩屏人主之所自衛者也大分既定
尊卑懸殊必恩意俯逮然後得盡其歡心宗親之歡
心得則遠近之歡心得矣其論正名革敝尤切中時
政太子在中書日夕明於聽斷四方州郡科徵輓漕

造作和市有係民休戚者聞之即日奏罷右丞盧世榮以言利進太子意深非之嘗曰財非天降安得歲取贏乎恐生民膏血竭於此也豈惟害民實國之大蠹其後世榮果坐罪桑哥素主世榮聞太子有言訖箝口不敢掾至元以來天下臻於太平人材輩出太子優禮遇之在師友之列者非朝廷名德則布衣節行之士德意未嘗少衰宋衛自疾賜鈔千五百緡王盤告老而歸官其壻于東平以終養孔洙自江南入覲則責張九思學聖人之道不知有聖人之後其大雅不群本於天性中外歸心焉於是世祖春秋高江

南行臺監察御史言事者請禪位於太子太子聞之懼臺臣寢其奏不敢遽聞而小人以臺臣隱匿乘間發之世祖怒甚太子愈益懼未幾遂薨壽四十有三成宗即位追謚曰文惠明孝皇帝廟號裕宗祔于太廟

顯宗

顯宗光聖仁孝皇帝諱甘麻剌裕宗長子也母曰徽仁裕聖皇后弘吉剌氏甘麻剌少育於祖母昭睿順聖皇后日侍世祖未嘗離左右畏慎不妄言言必無隱至元中奉旨鎮北邊叛王岳木忽兒等聞其至望

風請降既而都阿察八兒諸王遣使求和邊境以寧嘗出征駐金山會大雪擁火坐帳內歡甚頽謂左右曰今日風雪如是吾與卿處猶有寒色彼從士亦人耳腰弓矢荷刃周廬之外其苦可知遂命饗人大爲肉糜親嘗而徧賜之撫循部曲之暇則命也滅堅以國語講通鑑戒其近侍太不花曰朝廷以藩屏寄我事有不逮正在汝輩輔助其或依勢作威不用我命輕者論遣大者奏聞耳宜各慎之使百姓安業主上無北顧之憂則予與卿等亦樂處於此乃所以報國家也二十六年世祖以其居邊日久特命獵于柳林

之地率衆至遼州恐廩膳不均令左右司之分給從士仍飭其衆曰汝等飲食既足若復侵漁百姓是汝自取罪譴無悔衆皆如約民賴以安北還覲世祖于上京世祖勞之曰汝在柳林民不知擾朕實嘉焉明年冬封梁王授以金印出鎮雲南過中山又明年春過懷孟從卒馬馳之屬不下千百計所至未嘗橫取於民二十九年改封晉王移鎮北邊統領大祖四大幹韋朶及軍馬達達國土更鑄晉王金印授之中書省臣言于世祖曰諸王皆置傳今晉王守太祖肇基之地視諸王宜有加請置內史世祖從之遂以北安

王傅禿歸梁王傅木忒刺沙雲南行省平章賽陽並
爲內史明年置內史府又明年世祖崩晉王聞訃奔
赴上都諸王大臣咸在晉王曰昔皇祖命我鎮撫北
方以衛社稷久歷邊事願服厥職毋弟鐵木耳仁孝
宜嗣大統於是成宗即帝位而晉王復歸藩即元貞
元年塔塔兒部年穀不熟徽宣徽院賑之又荅荅刺
民飢請朝廷賑之詔賜王鈔千萬貫及銀帛有差皇
太后復以雲南所貢金器遣朶年來賜是歲冬奉詔
以知樞密院事札散同知徽政院事阿里罕爲內史
大德二年詔給秣米五百石五年成宗以邊士貧乏

分給鈔一千萬貫六年二月乙巳王薨年四十五天
性仁厚御下有恩元貞初藩邸屬官審伯年老請以
其子代之內史言於王王曰惟天子所命其自守如
此故尤爲朝廷所重然崇尚浮屠命僧作佛事歲耗
財不可勝計子三人曰也孫帖木兒曰松山曰迭里
哥兒不花王薨後十年仁宗即位謚王獻武又十一
年英宗遇弒也孫帖木兒以嗣晉王即皇帝位追尊
曰光聖仁孝皇帝廟號顯宗祔享太室又六年文宗
即位乃毀其廟室

則宗順宗

順宗昭聖衍孝皇帝諱荅刺麻八刺裕宗第二子也
母曰徽仁裕聖皇后弘吉刺氏至元初裕宗爲燕王
荅刺麻八刺生于燕邸明年詔裕宗居潮河八月召
至京師凡乘輿巡幸及歲時朝賀未嘗不侍裕宗以
行稍長世祖賜女侍郭氏其後乃納弘吉刺氏爲妃
二十二年裕宗薨荅刺麻八刺以皇孫鍾愛兩宮優
其出閣之禮二十八年始詔出鎮懷州以侍衛都指
揮使梭都尚書王倚從行至趙州從卒有伐民桑棗
者民遮訴于道荅刺麻八刺怒杖從卒以懲衆遣王
倚入奏世祖大悅未至以疾召還明年春世祖北幸
留治疾京師越兩月而薨年二十有九子三人長曰
阿木哥封魏王郭出也妃所生者曰海山是爲武宗
曰愛育黎穉力八達是爲仁宗大德十一年秋武宗
即位追謚曰昭聖衍孝皇帝廟號順宗祔享太廟

列傳卷第二

傳卷第三

元史一百十六

翰林學士雷奕知制誥修國史梁濂翰林待制承直郎同知制誥兼國史院編修官臣王緯等奉勅修

后妃二

睿宗顯懿莊聖皇后名峻魯帖尼怯烈氏生子憲宗世祖相繼為帝至元二年追上尊謚莊聖皇后升祔宗廟至大二年十二月加謚顯懿莊聖皇后三年十月又上玉冊其文曰祖功宗德稱誅於天內則闡儀受成於廟行之大者名必顯恩之隆者報則豐上以增佐定之光下以伸遁追之孝欽惟莊聖皇后英

明溥博聖善柔嘉尊儷景襄陰教純被逮事光獻婦
職勤修勲聿著於承天祥兩占於夢日跡聖緒洪源
之有漸知深仁厚澤之無垠玄符肇自塗山顧前徽
之未稱蒼籙興於文母豈後嗣之能忘是用參攷彝
經丕揚景鑠敷繹寶慈之誼形容青史之規謹遣攝
太尉某奉玉冊玉寶加上尊謚曰顯懿莊聖皇后伏
惟睿靈昭垂鑒格禮嚴闕宮樂歌夷則億萬斯年承
休無斃

裕宗徽仁裕聖皇后伯藍也怯赤一名闊闊真弘吉
刺氏生順宗成宗先是世祖出田獵道渴至一帳房
見一女子緝駝背世祖從覓馬湏女子曰馬湏有之
但我父母諸兄皆不在我女子難以與汝世祖欲去
之女子又曰我獨居此汝自來自去於理不宜我父
母即歸姑待之湏臾果歸出馬湏飲世祖世祖既去
嘆息曰得此等女子爲人家婦豈不美耶後與諸臣
謀擇太子妃世祖俱不允有一老臣嘗知向者之言
知其未許嫁言于世祖世祖大喜納爲太子妃后性
孝謹善事中宮世祖每稱之爲賢德媳婦侍昭睿順
聖皇后不離左右至溷厠所用紙亦以面擦令柔軟
以進一日裕宗有病世祖往視見牀上設織金卧褥

世祖愠而語之曰我嘗以汝爲賢何乃若此耶后跪
答曰常時不曾敢用今爲太子病恐有濕氣因用之
即時撤去世祖崩成宗至上都諸王畢會先是御史
中丞崔彧得玉璽于木華黎國王曾孫世德家其文
曰受命于天既壽永昌上之于后至是后手授成宗
即皇帝位尊后爲皇太后冊文曰自家而國治道必
有所先立愛惟親君德莫先於孝况恩深於鞠我而
注重於正名歷代以來令儀可考人子之職所在天
下之母宜尊恭惟聖母聖善本乎天資靜專法乎地道
上以奉宗祏之重下以叙倫紀之常助我前人守卷

耳憂勤之志保予冲子成思齊雍肅之風肆神器之
有歸知孫謀之素定畀付雖由於曆數規摹一出於
宸闈是用率籲衆心章明鉅度不勝拳拳大願謹奉
冊寶上尊稱曰皇太后伏惟長信穆穆周宗綿綿備
洛書之錫福粲慈極之儀天瑤圖寶運於萬斯年命
設官屬置徽政院後院官有受獻浙西田七百頃籍
於位下太后曰我寡居婦人衣食自有餘况江南率
土皆國家所有我曷敢私之即命中書省盡易院官
之受獻者后之弟欲因后求官后語之曰若欲求官
耶汝自爲之勿以累我也其後弟果被黜人皆服后

之先見大德四年二月崩祔葬先陵謚曰裕聖皇后
升祔裕宗廟至大三年十月又追尊謚曰徽仁裕聖
皇后

顯宗宣懿淑聖皇后名普顏怯里迷失弘吉刺氏顯
宗居晉邸納爲元妃生泰定帝泰定元年追尊宣懿
淑聖皇后其冊文曰祇纘皇圖方弘仁孝之化追崇
聖母永懷鞠育之恩匪建鴻名疇彰厚德欽惟皇妣
晉王妃弘吉刺氏淑侔周妣賢邁虞嬪儷我先王恪
守肇基之地昭其懿範益恢正始之風順坤道以承
乾炯月輝以遡日陰功久積衍聖緒於無疆神器攸

知慶源之有自仰徽音之如在慨至養之莫加聿
遷休辰爰脩縟典謹遣攝太尉某奉玉冊玉寶上尊
謚曰宣懿淑聖皇后伏惟淑靈在上式垂鑒臨合享
太宮永錫繁祉升祔皇考顯宗廟天曆初復祔顯宗
廟祀

順宗昭獻元聖皇后名答已弘吉刺氏按陳孫渾都
帖木兒之女裕宗居燕邸及潮河順宗俱在侍稍長
世祖賜女侍郭氏後乃納后爲妃生武宗及仁宗大
德九年成宗不豫卜魯罕皇后秉政遣仁宗母子出
居懷州十年十二月后至懷州十一年正月成宗崩

時武宗總兵北邊左丞相答剌罕哈剌哈孫陰遣使
報仁宗與后奔還京師后與仁宗入內哭復出居舊
邸朝夕入奠即遣使迎武宗還以五月即位先是太
后以兩太子星命付陰陽家推筭問所宜立對曰重
先大荒落有災旃蒙作噩長乂重光爲武宗生年旃
蒙爲仁宗生年太后頗惑其言遣近臣朶耳諭旨武
宗曰汝兄弟二人皆我所出豈有親疎陰陽家所言
運祚脩短不容不思也武宗聞之默然進康里脫脫
而言曰我捍北邊十年又胤次居長太后以星命爲
言江昧難信使我設施合於天心民望雖一日之短

亦足垂名萬世何可以陰陽家言一而乖祖宗之託哉
脫脫以聞太后愕然曰脩短之說雖出術家吾爲太
子遠慮所以深愛太子也太子旣如是言今當速來
耳詳見康里脫脫傳中五月武宗旣立即日尊太后
爲皇太后立仁宗爲皇太子三宮協和十一月帝朝
太后于隆福宮上皇太后玉冊玉寶至大元年三月
帝爲太后建興聖宮給鈔五萬疋絲二萬斤二年正
月太后幸五臺山作佛事詔高麗王璋從之四月立
興聖宮江淮財賦總管府以司太后錢糧三年二月
以上皇太后尊號告祀南郊四月以興聖宮鷹坊等

戶四千分處遼陽建萬戶府統之十月戊申帝率皇太子諸王群臣朝興聖宮上皇太后尊號冊寶曰儀天興聖慈仁昭懿壽元皇太后庚戌后恭謝太廟以皇太后受尊號詔赦天下四年仁宗即位延祐二年三月帝率諸王百官奉玉冊玉寶加上皇太后尊號曰儀天興聖慈仁昭懿壽元全德泰寧福慶皇太后延祐七年英宗即位十二月上尊號太皇太后冊文云王政之先無以加孝人倫之本莫大尊親肆予臨御之初首舉推崇之典恭惟太皇太后陛下仁施溥博明燭幽微爰自居淵潛之宮已有母天下之望方

武宗之北狩適成廟之賓天旋克振於乾綱諒再安於宗祏雖有在躬之歷數寔司創業之艱難儀式表於慈闈動協謀於先帝莫究補天之妙允如扶日之升位履至尊兩翼成於聖子嗣登大寶復擁佑於眇躬矧德邁塗山功高文母是宜加於四字式益衍於徽稱謹奉玉冊玉寶加上尊號曰儀天興聖慈仁昭懿壽元全德泰寧福慶徽文崇佑太皇太后於戲茲雖涉於強名庶庸申於善頌九州四海養未足於孝心萬歲千秋願永膺於壽祉丙辰太后御大明殿受朝賀戊辰告太廟太后見明宗少時有英氣而英宗

稍柔懦諸群小以立明宗必不利於已遂擁立英宗
及既即位太后来賀英宗即毅然見於色后退而悔
曰我不擬養此兒耶遂飲恨成疾至治三年二月崩
升祔順宗廟配食后性聰慧可坐佐三朝教宮中侍女
皆執治女功親操井曰然不中檢飭自正位東朝淫
恣益甚內則黑驢母亦烈失八用事外則幸臣失烈
門紐隣及時宰迭木帖兒相率為奸以至董辱平章
張珪等濁亂朝政無所不至及英宗立群倖伏誅而
後勢燄頓息焉

傳卷第三

列傳卷第四

元史一百一十七

翰林學士中大夫知制誥兼國史臣宋濂翰林待制齊同知制誥兼國史院編修官王禕等奉
教修

別里古台

宗王別里古台者烈祖之第五子太祖之季弟也天
性純厚明敏多智略不喜華飾軀幹魁偉勇力絕人
幼從太祖平諸部落掌從馬國法常以腹心遇敗則
牽從馬其子孫最多居處近太祖行在所南接按只
台營地嘗從太祖宴諸部族或潛圖害別里古台以
刃斫其臂傷甚帝大怒欲索而誅之別里古台曰今

將舉大事於天下其可以臣故而生釁際哉且臣雖傷甚幸不至死請勿治帝尤賢之當創業之初征取諸國王未嘗不在軍中摧鋒陷陣不避艱險帝嘗曰有別里古台之力哈撒兒之射此朕之所以取天下也其見稱如此嘗立為國相又長扎魯火赤別授之印賜以蒙古百姓三千戶及廣寧路恩州二城戶一萬一千六百三以為分地又以幹難怯魯之地建營以居江南平加賜信州路及鈐山州二城戶一萬八千王薨子曰罕秃忽曰也速不花曰口温不花罕秃忽性剛猛知兵從憲宗征伐多立戰功及攻釣魚山而還道由河南招來流亡百餘戶悉以入

子曰霍歷極以疾廢不能軍世祖俾居于恩以統其藩人至大三年霍歷極薨子塔出顯塔出性温厚謙恭好學通經史能撫恤其民云也速不花子曰爪都中統三年始以推戴功封廣寧王至元十三年賜銀印口温不花領兵河南屢建大功子曰滅里吉台甕言刺台

木赤

木赤者太祖長子也國初以親王分封西北其地極遠去京師數萬里驛騎急行二百餘日方達京師以

故其地郡邑風俗皆莫得而詳焉木赤薨子拔都嗣
拔都薨弟撒里答嗣撒里答薨弟忙哥帖木兒嗣忙
哥帖木兒薨弟脫脫忙哥嗣脫脫忙哥薨弟脫脫嗣
脫脫薨弟伯忽嗣伯忽薨弟月即別嗣至元二年月
即別遣使來求分地歲賜以賑給軍站京師元無所
領府治三年中書請置總管府給正三品印至大元
年月即別薨子札牙別嗣其位下舊賜平陽晉州永
州分地歲賦中統鈔二千四百定自至元五年己卯
歲始給之

秃剌

秃剌太祖次子察合台四世孫也少以勇力聞大德
十一年春成宗崩左丞相阿忽台等潛謀立安西王
阿難答而推皇后伯岳吾氏稱制中外洵洵仁宗歸
自懷孟引秃剌入內縛阿忽台等以出誅之大事遂
定武宗即位第功封越王錫金印以紹興路為其分
地秃剌居常快快有怨望意至大元年秋武宗幸涼
亭將御舟秃剌前止之帝曰爾何如朕欲登舟秃剌
曰人有常言一箭中麋母曰自能百兔未得未可遽
止此蓋國俗儕輩相斬之語而秃剌言之武宗由是
銜焉既而大宴萬歲山秃剌醉起解其腰帶擲諸地

嗔目謂帝曰爾與我者止此爾帝益疑其有異志二年春命楚王牙忽都丞相脫脫平章赤因鐵木兒鞠之辭服遂伏誅子西安王阿剌忒納失里天曆初以推戴功進封豫王

牙忽都

牙忽都祖父撥綽睿宗庶子也撥綽之母曰馬一實乃馬真氏撥綽驍勇善騎射憲宗命大將軍北征欽察有功賜號撥都歲丁巳分土諸侯王賜蠶州三千三百四十七戶為其食邑撥綽娶察渾滅兒乞氏生薛必烈傑兒薛必烈傑兒娶弘吉刺氏生牙忽都牙

忽都年十三世祖命襲其祖父統軍至元十二年從北安王北征十三年失列吉叛遣人誘脅之牙忽都不從事王益忠謹入魯渾拔都兒粘闡與海都通相率引去王遣牙忽都将兵追之擒入魯渾等以獻未幾失列吉約木忽兒脫帖木兒等反以兵攻王脫帖木兒生致牙忽都使失列吉拘繫之牙忽都與王親臣那台等謀逃歸事覺那台等被殺復繫牙忽都困辱備至十四年兀魯兀台伯顏帥師討叛失吉列約木忽兒迎戰牙忽都潛結赤斤帖木兒禿禿哈亂其陣失列吉軍亂因得脫走見帝鬚髮盡白帝閔之賞

賚甚厚至元十八年加封耒陽州五千三百四十七戶二十一年命與禿禿哈同討海都牙忽都先進邏得謀人知其虛實直前衝敵陣破其精兵海都敗走得所俘掠軍民而還朶兒朶哈上其功詔賜鈔幣鎧甲弓矢其後北安王駐帖木兒河乃顏也不堅有異圖也不堅引兵趨怯綠憐河大帳王遣闊闊出禿禿哈率衆追之那懷之民擾攘不知所從牙忽都将三百騎進至阿赤怯地會王帳下遜篤思部兵逃去牙忽都諭之使還時怯必禿忽兒霍台誘蒙古軍二萬從乃顏牙忽都知之夜襲其河上軍突入帳中遇忽

都滅兒堅幾獲之間道逸去二十七年海都入寇朶兒朶哈方居守大帳詔遣牙忽都同力備禦軍未戰而潰牙忽都妻帑輜重駐不思哈刺嶺上悉爲藥木忽兒明理帖木兒所掠牙忽都與其子脫列帖木兒相失獨與十三騎奔還世祖撫慰嘉歎賜爵鎮遠王塗金銀印以弘吉刺氏女賜之資裝特厚復命納里忽徹徹不花往錫命其部屬同時被剽掠者以故相桑哥家財分賜之仍各賜白金五十兩珠子一酒卮鈔幣稱是又命牙忽都居北安王第二帳王薨帝命掌大帳固辭成宗立命牙忽都常侍左右武宗撫

兵漠北請以子脫列帖木兒從大德五年海都篤哇
合軍入寇脫列帖木兒將兵千人擁護先後力箴功
多在軍十年成宗崩安西王阿難答與明理帖木兒
窺望神器牙忽都曰世祖皇帝之嫡孫在神器所當
屬安西藩王也入繼非制武宗即位以其父子勞効
忠勤益厚遇之進封楚王賜金印置王傅以駙馬都
尉都刺哈之女弟弘吉烈氏爲楚王妃又以叛王察八
兒親屬賜之脫列帖木兒襲封鎮遠王至大三年察
八兒來歸宗親皆會牙忽都進曰太祖皇帝削平四
方惟南土未定列聖嗣位未遑統一世祖皇帝混一

四海顧惟宗室諸王弗克同堂而燕今陛下洪福齊
天拔都罕之裔首已附順叛王察八兒舉族來歸人
民境土悉爲一家地大物衆有可恃者焉有不可恃
者焉昔我太祖有訓世祖誦之臣與有聞台亂國者
宜以法齊之所以辨上下定民志今請有以整飭之
則人將有所勸懲惟陛下鑒之帝嘉納其言牙忽都
薨仁宗命脫列帖木兒嗣楚王延祐中明宗西出脫
列帖木兒坐累徙西番没入其家賞之半明宗即位
制曰脫列帖木兒何罪其轉徙籍没豈不以我故耶
其復故號人民貨帑悉歸之脫列帖木兒薨子八都

見立八都兒薨有子三人曰燕帖木兒曰速哥帖木兒曰朶羅不花燕帖木兒嗣時年十有二妃弘吉刺氏哈只兒駙馬之女孫速哥失里皇后之從妹也

寬徹普化

寬徹普化世祖之孫鎮南王脫歡子也泰定三年封威順王鎮武昌賜金印撥付怯薛丹五百名又自募至一千名設王傅官屬湖廣行省供億錢糧衣裘歲支米三萬石錢三萬二千錠又日給王子諸妃飲饌文宗天曆初賜寬徹普化金銀各五十兩幣三十匹仍鎮湖廣而寬徹普化縱怯薛等官侵奪民利民頗

患苦之至元五年太師伯顏矯制召赴京貶之及脫脫爲相始明其無辜命復還鎮至正二年湖北廉訪司糾言寬徹普化恃以宗室恣行不法不報十一年徐壽輝爲亂起斬黃寬徹普化與其子別帖木兒吞帖木兒引兵至金剛臺壽輝部將倪文俊敗之執別帖木兒十二年壽輝僞將鄒普勝陷武昌寬徹普化與湖廣行省平章和尚棄城走詔追奪寬徹普化印而誅和尚十三年湖廣行省叅知政事阿魯輝克復武昌及漢陽寬徹普化復率領王子并本部怯薛丹屢討賊立功十四年詔寬徹普化復鎮武昌還其印

十六年命寬徹普化與宣讓王帖木兒不花以兵鎮
遏懷慶各賜黃金一錠白金五錠幣帛九匹鈔二十
錠未幾復還武昌命其子報恩奴接待奴佛家奴以
大船四十餘隻水陸並進至沔陽攻徐壽輝僞將倪
文俊且載妃妾以行兵至漢川縣雞鳴汊水淺船閣
不能行文俊以火筏盡焚其船接待奴佛家奴皆遇
害報恩奴自死妃妾皆陷寬徹普化走陝西二十
五年侯伯顏答失奉寬徹普化自雲南經蜀轉戰而
去至成州欲之京師李思齊以取蜀為名扼不令行
俾屯田于成州以没其子曰和尚者封義王侍從順

帝左右多著勞劾帝出入常與俱至正二十四年孛
羅帖木兒稱兵犯闕遂為中書右丞相總握國柄恣
為淫虐和尚心忿其無君數為帝言之受密旨與儒
士徐士本謀交結勇士上都馬金那海伯顏達兒帖
古思不花火你忽都洪寶寶黃哈刺八禿龍從雲陰
圖刺孛羅帖木兒帝期以事濟放鴿鈴為號徐士本
掌之明年七月孛羅帖木兒入奏事行至延春閣李
樹下伯顏達兒自眾中奮出斫孛羅帖木兒中其腦
上都馬等競前斫死之詳見孛羅帖木兒傳二十八
年順帝將北奔詔准王帖木兒不花監國而以和尚

三十九
佐之及京城將破即先遁不知所之

帖木兒不花

帖木兒不花世祖孫鎮南王脫歡第四子也初世祖第九子脫歡以討安南無成功終身不許見遂封鎮南王出鎮揚州脫歡薨子老章襲封鎮南王老章薨弟脫不花襲封鎮南王脫不花薨子孛羅不花幼帖木兒不花乃嗣爲鎮南王文宗天曆初賜帖木兒不花黃金五十兩白金五十兩幣三十匹二年孛羅不花已長帖木兒不花請以其位復還孛羅不花朝廷以其讓而不居也改封宣讓王賜金印移鎮於廬州

順帝至元元年撥廬州饒州牧地一百頃賜之二年賜市宅錢四千錠命其王府官凡班次列于有司之右五年伯顏擅權矯制貶帖木兒不花及威順王完徹普化至脫脫爲相始言于帝明此兩王者皆無辜詔令復還鎮至正十二年廬州境內賊起淮西廉訪使陳思謙言于帖木兒不花曰王以帝室之冑鎮撫淮甸豈宜坐視且府中官屬及怯薛丹人等數甚多必有可使摧鋒陷陣者惟王圖之帖木兒不花大悟其言曰此吾責也即命以所部兵及諸王乞塔歹等分道擊賊擒其渠帥廬州境內皆平帝聞之賜金帶

銀鈔以賞其功十六年命帖木兒不花與寬徹普化以兵鎮遏懷慶路賜金銀各一錠幣帛九匹鈔二十錠既而汝穎之寇南渡淮帖木兒不花復以便冝調芍陂屯軍拒之及廬州不守乃挈身北歸留京師二十七年進封淮王賜金印設王傅等官二十八年大明兵逼京師順帝北奔詔以帖木兒不花監國而拜慶童中書左丞相輔之俄而城破帖木兒不花死之年八十三

傳卷第四

列傳卷第五

元史一百一十八

翰林學士帶大夫知制誥兼修國史臣宋濂翰林待制承旨同知制誥兼國史院編修官臣禮等奉

勅修

特薛禪

特薛禪姓字思忽兒弘吉刺氏世居朔漠本名特因從太祖起兵有功賜名薛禪故兼稱曰特薛禪女曰孛兒台太祖光獻翼聖皇后子曰按陳從太祖征伐凡三十二戰平西夏斷潼關道取回紇尋斯干城皆與有功歲丁亥賜號國舅按陳那顏壬辰賜銀印封河西王以統其國族丁酉賜錢二十萬緡有旨弘吉

刺氏生女世以爲后生男世尚公主每歲四時孟月
聽讀所賜旨世世不絕又賜所俘獲軍民五千二百
仍授萬戶以領之按陳薨葬官人山元貞元年二月
追封濟寧王謚忠武妻哈真追封濟寧王妃子幹陳
歲戊戌授萬戶尚睿宗女也速不花公主幹陳薨葬
不海韓弟納陳歲丁巳襲萬戶奉旨伐宋攻釣魚山
又從世祖南涉淮甸下大清口獲船百餘艘又率兵
平山東濟兗單等州及阿里不哥叛中統二年與諸
王北伐以其子哈海脫歡幹羅陳等十人自從至于
奔來由失木魯與阿里不哥之黨八兒哈八兒思等

戰追北至李羅克禿復戰自旦及夕斬首萬級僵尸
被野薨葬未懷禿幹羅陳襲萬戶尚完澤公主完澤
公主薨繼尚囊加真公主至元十四年薨葬拓刺里
無子弟曰帖木兒至元十八年襲萬戶二十四年乃
顏叛從帝親征以功封濟寧郡王賜白傘蓋以寵之
二十五年諸王哈丹禿魯干叛與諸王及統兵官王
速帖木兒等率兵討之由龜刺兒河與哈丹等遇轉
戰至憐木連河殲其衆帝賜名按察兒禿那顏以旌
其功薨葬未懷禿子二人長曰瑀阿不刺次曰桑哥
不刺皆幼至元二十七年以其弟蠻子台襲萬戶亦

尚囊加真公主成宗即位封皇姑魯國大長公主以金印封蠻子台爲濟寧王奉旨率本部兵討叛王海都篤哇既與之遇方約戰行伍未定單騎突入陣中徃復數回敵兵大擾一戰遂大捷時武宗在藩邸統大軍以鎮朔方有旨令蠻子台總領蒙古軍民官輔武守莽來以遏北方囊加真公主薨繼尚裕宗女喃哥不刺公主蠻子台薨年五十有二大德十一年三月按答兒長子凋阿不刺襲萬戶尚祥哥刺吉公主六月封大長公主賜凋阿不刺金印加封魯王至大二年賜平江稻田一千五百頃皇慶間加封皇姊大

長公主天曆間加號皇姑徽文懿福真壽大長公主至大三年凋阿不刺薨葬木懷禿阿里嘉室利凋阿不刺嫡子也至大三年甫八歲襲萬戶四年七月襲封魯王尚朶兒只班公主元統元年阿里嘉室利薨至順間封朶兒只班號肅雍賢寧公主桑哥不刺者魯王凋阿不刺之弟阿里嘉室利之叔也自幼奉世皇旨養于幹可珍公主所是爲不只兒駒馬後襲統其本部民四百戶成宗時奉旨尚普納公主至順間封鄆安大長公主授桑哥不刺金印封鄆安王職千戶元統元年授萬戶二年三月加封鄆安公主號皇

姑大長公主加封桑哥不刺魯王以疾薨年六十一
此皆以駙馬襲封王爵者也唆兒火都者亦按陳之
子以從征功在太祖朝遙受左丞相爲千戶仍賜以
塗金銀章及金銀字海青圓符五驛馬券六其子曰
阿哈駙馬當憲宗朝嘗率兵破徐州以功受賞黃金
一錠白金十錠及銀鞍勒仍命襲父官至世祖時有
詔弘吉刺萬戶所受驛券圓符皆仍其舊凡唆兒火
都所受者宜皆收之而唆兒火都之諸孫若孛羅沙
伯顏蠻子添壽不花大都不花掌吉等及阿哈千戶
之孫曰也速達兒與按陳之弟名冊者在太祖世授

官本藩蒙古軍站千戶冊之子曰哈兒哈孫以平金
功賜號拔都兒哈兒哈孫之孫曰都羅兒至元四年
授光祿大夫以銀章封懿國公有脫憐者亦按陳之
裔孫也世祖授本藩千戶仍賜驛券圓符各四令以
兵守朔土之怯魯連二十四年從族父按答兒禿征
叛王乃顏有功亦賜號拔都兒脫憐卒子迸不刺嗣
迸不刺卒子買住罕嗣買住罕尚拜答沙公主卒弟
孛羅帖木兒嗣以金章封毓德王孛羅帖木兒薨買
住罕孫阿失襲千戶有名丑漢者按陳次子必哥之
裔孫尚台忽魯都公主仁宗朝封安遠王以兵守莽

來有答兒罕者亦特薛禪之裔孫也以從軍功世祖亦賜以拔都兒之號加賜黃金一錠其子曰不只兒從征乃顏禽其黨金家奴帝賞以金帶其後有曰伯奢者即其孫也又按陳之孫納合尚太宗唆兒哈罕公主火忽之孫不只兒尚幹可真公主又特薛禪諸孫有名脫羅禾者尚不魯罕公主繼尚闊闊倫公主此皆尚公生爲駙馬者也凡其女之爲后者自光獻翼聖皇后以降憲宗貞節皇后諱忽台及后妹也速兒皆按陳從孫忙哥陳之女世祖昭睿順聖皇后諱察必濟寧忠武王按陳之女其諱帖古倫者按陳孫

脫憐之女諱喃必冊繼守正宮者納陳孫僊童之女成宗貞慈靜懿皇后諱實憐答里幹羅陳之女也順宗昭獻元聖皇后諱答吉大德十一年十一月武宗冊上皇太后至大三年十月加上尊號曰儀天興聖慈仁昭懿壽元皇太后仁宗延祐二年加上尊號曰儀天興聖慈仁昭懿壽元全德泰寧福慶皇太后延祐七年又加徽文崇祐四字尊號太皇太后則按陳孫渾都帖木兒之女武宗宣慈惠聖皇后諱真哥脫憐子迸不刺之女其諱速哥失里者按陳從孫哈兒只之女泰定皇后諱八不罕按陳孫幹留察兒之女

其諱必罕諱速哥答里者皆脫憐孫買住罕之女文
宗皇后諱不答失里瑯阿不刺魯王之女此則弘吉
刺氏之為后者也初弘吉刺氏族居於苦烈兒溫都
兒斤迭烈木兒也里古納河之地歲甲戌太祖在迭
蔑可兒時有旨分賜按陳及其弟火忽冊等農土農
猶言經界也若曰是苦烈兒溫都兒斤以與按陳及哈撒
兒為農土申諭按陳曰可木兒溫都兒答兒腦兒迭
蔑可兒等地汝則居之諭冊曰阿刺忽馬乞迤東蒜
吉納禿山木兒速拓哈海幹連直至阿只兒哈溫都
哈老哥魯等地汝則居之當以胡盧忽兒河北為鄰

按赤台為界又諭火忽曰哈老溫迤東塗河潢河之
閒火兒赤納慶州之地與亦乞列思為隣汝則居之
又諭按陳之子唆魯火都曰以汝父子能輸忠于國
可木兒溫都兒迤東絡馬河至于赤山塗河迤南與
國民為隣汝則居之至至元七年幹羅陳萬戶及其
妃囊加真公主請于朝曰本藩所受農土在上都東
北三百里答兒海子寔本藩駐夏之地可建城邑以
居帝從之遂名其城為應昌府二十二年改為應昌
路元貞元年濟寧王蠻子台亦尚囊加真公主復與
公主請於帝以應昌路東七百里駐冬之地初建城

邑復從之大德元年名其城為全寧路弘吉刺之分
邑得任其陪臣為達魯花赤者有濟寧路及濟兗單
三州鉅野鄆城金鄉虞城碭山豐縣肥城任城魚臺
沛縣單父嘉祥磁陽寧陽曲阜泗水一十六縣此丙
申歲之所賜也至元六年陞古濟州為濟寧府十八
年始陞為路而濟兗單三州隸焉又汀州路長汀寧
化清流武平上杭連城六縣此至元十三年之所賜
也又有永平路灤州盧龍遷安撫寧昌黎石城樂亭
六縣此至大元年之所賜也若平江稻田一千五百
頃則至大二年所賜也其應昌全寧等路則自達魯
花赤總管以下諸官屬皆得專任其陪臣而王人不與
焉此外復有王傅府自王傅六人而下其群屬有錢
糧人匠鷹房軍民軍站營田稻田烟粉千戶總管提
舉等官以署計者四十餘以員計者七百餘此可得
而稽攷者也其五戶絲金鈔之數則丙申歲所賜濟
寧路之三萬戶至元十八年所賜汀州路之四萬戶
絲以斤計者歲二千二百有奇鈔以錠計者歲一千
六百有奇此則所謂歲賜者也

李禿

李禿亦乞列思氏善騎射太祖嘗潛遣木兒徹丹出

使至也兒古納河孛堧知其為帝所遣值日暮因留
 止宿殺羊以享之未兒徹丹馬疲乏復假以良馬及
 還孛堧待之有加木兒徹丹具以白帝帝大喜許妻
 以皇妹帖木倫孛堧宗族乃遣也不堅可等詣太祖
 因致言曰臣聞威德所加若雲開見日春風解凍喜
 不自勝帝問孛堧孛堧畜幾何也不堅可對曰有馬三
 十匹請以馬之半為聘禮帝怒曰婚姻而論財殆若
 商賈矣昔人有言同心實難朕方欲取天下汝亦乞
 列思之民從孛堧効忠於我可也何以財為竟以皇
 妹妻之既而札赤刺可札木哈脫也等以兵三萬入

寇孛堧聞之遣波藥可磨里堧來告乃與哈刺里
 札刺兀塔兒哈泥等討脫也等掠其輜重降其民乃
 蠻叛帝召孛堧以兵至大戰敗之皇妹薨復妻以皇
 女火臣別吉而命哈兒八台之子也可忽林圖帶弓
 矢為之侍哈兒八台曰吾兒豈能為人臣僕寧死不
 為也帝令孛堧與之敵哈兒八台今月列等拒戰於
 碗圖河孛堧直前擒月列刺殺也可忽林圖哈兒八
 台走渡拙赤河又擒之盡殺其衆從太師國王木華
 黎略地遼東西以功封冠懿二州從征西夏病薨贈
 推忠宣力佐命功臣太師開府儀同三司駙馬都尉

上柱國進封昌王謚忠武子鎖兒哈襲爵

鎖兒哈事太宗與木華黎取嘉州降其民遣伯禿兒哈拙赤碣來獻捷帝曰若父宣力國家朕昔見之今鎖兒哈克光前烈賜以金錦金帶七寶鞍召至中都以疾薨鎖兒哈娶皇子幹赤女安禿公主生女是爲憲宗皇后子札忽兒臣從定宗出討萬奴有功太宗命親王安赤台以女也孫真公主妻之薨贈推誠靖宣佐運贊治功臣太師開府儀同三司駙馬都尉上柱國襲封昌王謚忠靖札忽兒臣有子二人長月列台娶皇子賽因主卜女哈答罕公主生脫別台與乃

顏戰有功次忽憐

忽憐尚憲宗女伯牙魯罕公主後脫黑帖木兒叛世祖命忽憐與失列及等討之大戰終日脫黑帖木兒敗走帝嘉之復令尚憲宗孫女不蘭奚公主宋平封以廣州乃顏聲刺哈兒叛世祖親征薛徹堅等與哈刺罕屢戰帝召忽憐至值薛徹堅等戰于程火失温之地哈答罕衆甚盛忽憐以兵二百迎敵敗之哈答罕等走度祿河還其巢穴踰年夏帝命忽憐復征之至曲列兒塔兀兒二河之間大戰其衆皆度塔兀河遁去余百人逃匿山谷忽憐即率兵二百徒步追之

薛徹堅止之曰彼亡命者安得徒行忽憐不聽往殺其衆薛徹堅以聞賜金一錠銀五錠又踰年復往征之與哈答罕遇于兀刺河忽憐夜率千人潛入其軍盡殺之帝賜鈔五萬貫金一錠銀十錠忽憐薨贈勅忠保德輔運佐理功臣太師開府儀同三司駙馬都尉上柱國追封昌王謚忠宣子阿失事成宗篤哇叛于海都帝遣晉王甘麻剌并武宗帥師討之大德五年戰哈刺答山阿失射篤哇中其膝擒殺甚多篤哇號哭而遁武宗賜之衣成宗加賜珠衣封爲昌王置王府官屬仁宗朝復賜以寧昌縣稅入阿失尚成宗

女亦里哈牙公主復尚憲宗曾孫女買納公主阿失薨子八刺失里襲封昌王忽憐從弟不花尚世祖女兀魯真公主其弟鎖郎哈娶皇子忙哥剌女奴兀倫公主生女是爲武宗仁獻章聖皇后寔生明宗

阿刺兀思剔吉忽里

阿刺兀思剔吉忽里汪古部人系出沙陀鴈門之後遠祖卜國世爲部長金源氏堑山爲界以限南北阿刺兀思剔吉忽里以一軍守其衝要特西北有國曰乃蠻其主太陽可汗遣使來約欲相親附以同擾朔方部衆有欲從之者阿刺兀思剔吉忽里弗從乃執

其使奉酒六尊具以其謀來告太祖時朔方未有酒
太祖飲三爵而止曰是物少則發性多則亂性使還
酬以馬五百羊一千遂約同攻太陽可汗阿剌兀思
剌吉忽里先期而至既平乃蠻從下中原復爲嚮導
南出界垣太祖留阿剌兀思剌吉忽里歸鎮本部爲
其部衆昔之異議者所殺長子不顏昔班併死之其
妻阿里黑孛幼子孛要合與姪鎮國逃難夜遁至界
垣告守者繼城以登因避地雲中太祖既定雲中購
求得之賜與甚厚乃追封阿剌兀思剌吉忽里爲高
唐王阿里黑爲高唐王妃以其子孛要合尚幼先封

其姪鎮國爲北平王鎮國薨子聶古台襲爵尚睿宗
女獨木干公主略地江淮薨于軍賜興州民千餘戶
給其葬孛要合幼從攻西域還封北平王尚阿剌海
別吉公主公主明睿有智略車駕征伐四出嘗使留
守軍國大政諮稟而後行師出無內顧之憂公主之
力居多孛要合未有子公主爲進姬妾以廣嗣續生
三子曰君不花曰愛不花曰拙里不花公主視之皆
如已出孛要合薨追封高唐王謚武毅後加贈宣忠
協力翊衛果毅功臣太傅儀同三司上柱國駙馬都
尉追封趙王公主阿剌海別吉追封皇祖姑齊國大

長公主加封趙國子君不花尚定宗長女葉里迷失
公主愛不花尚世祖季女月烈公主中統初總兵討
阿里不哥敗闊不花於按檀火爾歡之地三年圍李
壇于濟南獨當一面事平又從征西北敗叛王之黨
撒里蠻子孔古烈愛不花卒子闊里吉思

闊里吉思性勇毅習武事尤篤於儒術築萬卷堂於
私第日與諸儒討論經史性理陰陽術數靡不該貫
尚忽答的迷失公主繼尚愛牙失里公主宗王也不
干叛率精騎千餘晝夜兼行旬日追及之時方暑將
戰北風大起左右請待之闊里吉思曰當暑得風天

贊我也策馬赴戰騎士隨之大殺其衆也不干以數
騎遁去闊里吉思身中三矢斷其髮凱還詔賜黃金
三斤白金千五百斤成宗即位封高唐王西北不安
請於帝願往平之再三請帝乃許及行且誓曰若不
平定西北吾馬首不南大德元年夏遇敵于伯牙思
之地衆謂當俟大軍畢至與戰未晚闊里吉思曰大
丈夫報國而待人耶即整衆鼓躁以進大敗之擒其
將卒百數以獻詔賜世祖所服貂裘寶鞍及繒錦七
百介冑戈戟弓矢等物二年秋諸王將帥共議防邊
咸曰敵往歲不冬出且可休兵于境闊里吉思曰不

然今秋候騎來者其少所謂驚鳥將擊必匿其形備
 不可緩也衆不以爲然闊里吉思獨嚴兵以待之是
 冬敵兵果大至三戰三克闊里吉思乘勝逐北深入
 險地後騎不繼馬蹶陷敵遂爲所執敵誘使降惟正
 言不屈又欲以女妻之闊里吉思毅然曰我帝婿也
 非帝后面命而再娶可乎敵不敢逼帝嘗遣其家臣
 阿昔思特使敵境見於人衆中闊里吉思一見輒問
 兩宮安否次問嗣子何如言未畢左右即引其去明
 日遣使者還不復再見竟不屈死焉九年追封高唐
 忠憲王加贈推忠宣力崇文守正亮節保德功臣大

師開府儀同三司上柱國駙馬都尉追封趙王公主
 忽答的迷失追封齊國長公主愛牙失里封齊國公
 主並加封趙國子木安幼詔以第木忽難襲高唐王
 木忽難才識英偉謹守成業撫民御衆境內乂安癸
 其兄死節遣使如京師表請卹典又請翰林承旨闡
 復銘諸石教養木安過於己子命家臣之謹厚者掌
 其兄之珍服秘玩待木安成立悉以付之至大二年
 木忽難加封趙王即以讓木安三年木安襲趙王尚
 晉王女阿刺的納入刺公主一日召王傅脫歡司馬
 阿昔思謂曰先王旅殯卜羅荒遠之地神靈將何依

吾痛心欲無生若請於上得歸葬先塋瞑目無憾矣
 二人言之知樞密院事也里吉尼以聞帝嗟悼久之
 曰木安孝子也即賜阿昔思黃金一瓶得脫歡之子
 失忽都魯王傳木忽難之子阿魯忽都斷事官也先
 等一十九人乘驛以往復賜從者鈔五百貫淇陽王
 月赤察兒丞相脫禾出入都魯差兵五百人護其行
 至殯所奠告啓視尸體如生遂得歸葬

列傳卷第五

列傳卷第六

元史一百一十九

翰林學士帝矣知制誥兼修國史臣宋濂翰林特制承直郎兼國史院編修官臣李達等奉

勅修

木華黎

木華黎札刺兒氏世居阿難水東父孔溫窟哇以戚
 里故在太祖麾下從平篋里吉征乃蠻部數立功後
 乃蠻又叛太祖與六騎走中道乏食擒水際橐駝殺
 之燔以啖太祖追騎垂及而太祖馬蹶五騎相顧駭
 聘孔溫窟哇以所乘馬濟太祖身當追騎死之太祖
 獲免有子五人木華黎其第三子也生時有白氣出

帳中神巫異之曰此非常兒也及長冗毅多智畧猿臂善射挽弓二石強與博爾木博爾忽赤老温事太祖俱以忠勇稱號授里班曲律猶華言四傑也太祖軍嘗失利會大雪失牙帳所在夜卧草澤中木華黎與博爾木張裘羶立雪中障蔽太祖達旦竟不移足一日太祖從三十餘騎行谿谷間顧謂曰此中或遇寇當柰何對曰請以身當之既而寇果自林間突出矢下如雨木華黎引弓射之三發中三人其酋呼曰爾爲誰曰木華黎也徐解馬鞍持之捍衛太祖以出寇遂引去克烈王可汗與乃蠻部讎戰求援於太祖太祖

祖遣木華黎及博爾木等救之盡殺乃蠻之衆于按臺之下獲甲仗馬牛而還既而王可汗謀襲太祖其下拔台知之密告太祖太祖遣木華黎選精騎夜斫其營王可汗走死諸部大人聞風款附歲丙寅太祖即皇帝位首命木華黎博爾木爲左右萬戶從容謂曰國內平定汝等之力居多我與汝猶車之有轂身之有臂也汝等切宜體此勿替初心金之降者皆言其主璟殺戮宗親荒淫日恣帝曰朕出師有名突辛未從伐金溥宣德遂克德興壬申攻雲中九原諸郡拔之進圍撫州金兵號四十萬陣野狐嶺北木華黎

曰彼衆我寡弗致死力戰未易破也率敢死士策馬橫戈大呼陷陣帝麾諸軍並進大敗金兵追至滄河殪尸百里癸酉攻居庸關壁堅不得入遣別將閣別統兵趨紫荆口金左監軍高琪引兵來拒不戰而潰遂拔涿州因分兵攻下益都濱棣諸城遂次霸州史天倪蕭勃迭率衆來降並奏爲萬戶甲戌從圍燕金主請和北還命統諸軍征遼東次高州盧琮金朴以城降乙亥裨將蕭也先以計平定東京進攻北京金守將銀青率衆二十萬拒花道達戰敗之斬首八萬餘級城中食盡契丹軍斬關來降進軍逼之其下殺

銀青推寅答虎爲帥遂舉城降木華黎怒其降緩欲坑之蕭也先曰北京爲遼西重鎮旣降而坑之後豈有降者乎從之奏寅答虎留守北京以吾也而權兵馬都元帥鎮之遣高德玉劉蒲速窩兒招諭興中府同知兀里卜不從殺蒲速窩兒德玉走免未幾吏民殺兀里卜推土豪石天應爲帥舉城降奏爲興中尹兵馬都提控錦州張鯨聚衆十餘萬殺節度使稱臨海郡王至是來降詔木華黎以鯨總北京十提控兵從撥忽闌南征未附州郡木華黎密察鯨有反側意請以蕭也先監其軍至平州鯨稱疾逗留復謀遁去

監軍蕭也先執送行在誅之鯨弟致憤其兄被誅據
錦州叛畧平藥瑞利義懿廣寧等州木華黎率蒙古
不花等軍數萬討之州郡多殺致所署長吏降進逼
紅羅山主將杜秀降奏為錦州節度使丙子致陷興
中府七月進兵臨興中先遣吾也而等攻溜石山諭
之曰今若急攻賊必遣兵來援我斷其歸路致可擒
也又遣蒙古不花也來德縣東候之致果遣鯨子東
平將騎兵八千步卒三萬援溜石蒙古不花引兵趨
之馳報木華黎夜半引兵疾馳遇于神水縣東夾擊
之分麾下兵之半下馬步戰選善射者數千令曰賊

步兵無甲疾射之乃摩騎兵齊進大敗之斬東平及
士卒萬二千八百餘級拔開義縣進圍錦州致遣張太
平高益出戰又敗之斬首三千餘級溺死者不可勝數
圍守月餘致憤將校不勦力殺敗將二十餘人高益懼
縛致出降伏誅廣寧劉琰懿州田和尚降木華黎曰
此叛寇存之無以懲後除工匠優伶外悉屠之拔蘇
復海三州斬完顏衆家奴咸平宣撫蒲鮮等率衆十
餘萬遁入海島丁丑八月詔封太師國王都行省承
制行事賜誓券黃金印曰子孫傳國世世不絕分弘
吉刺亦乞烈思兀魯兀忙兀等十軍及吾也而契丹

蕃漢等軍並屬麾下且諭曰太行之北朕自經畧太行以南卿其勉之賜大駕所建九旂大旗仍諭諸將曰木華黎建此旗以出號令如朕親臨也乃建行省于雲燕以圖中原遂自燕南攻遂城及蠡州諸城拔之冬破大名府遂東定益都淄登萊濰密等州戊寅自西京由大和嶺入河東攻太原忻代澤潞汾霍等州悉降之遂徇平陽金守臣棄城遁以前鋒拓拔按察兒統蒙古軍鎮之拒金兵以義州監軍李廷植之弟守忠權河東南路帥府事己卯以蕭特末兒等出雲朔攻降岢嵐火山軍以谷里夾打爲元帥達魯花

赤攻拔石隰州擊絳州克之庚辰復由燕徇趙至蒲城武仙舉真定來降權知河北西路兵馬事史天倪進言曰今中原粗定而所過猶縱兵抄掠非王者弔民之意也木華黎曰善下令禁無剽掠所獲老稚悉遣還田里軍中肅然吏民大悅兵至滏陽金邢州節度使武貴迎降進攻天平寨破之遣蒙古不花分兵畧定河北衛懷孟州入濟南嚴實籍所隸相魏磁洺恩博滑濬等州戶三十萬詣軍門降時金兵屯黃陵岡號二十萬遣步兵二萬襲濟南木華黎以輕兵五百擊走之遂會大軍薄黃陵岡金兵陣河南岸示以死戰木華黎曰此不可用

長兵當以短兵取勝令騎下馬引滿齊發亦下馬督戰果大敗之溺死者衆進攻楚丘楚丘城小而固四面皆水令諸軍以草木填塹直抵城下嚴實率所部先登拔之攻下單州圍東平以實權山東西路行省戒之曰東平糧盡必棄城走汝伺其去即入城安輯之勿苦郡縣以敗事也留校魯忽禿以蒙古軍三千屯守之辛巳四月東平糧盡金行省忙古奔汴校魯忽禿邀擊之斬七千餘級忙古引數百騎遁去實入城建行省撫其民先是郡王帶孫攻洛不下至是遣石天應拔之五月還軍野狐嶺宋連水忠義統轄石珪來降以爲濟交單

三州都總管予綉衣王帶勞之曰汝不憚跋涉數千里慕義而來尋當列奏賜汝高爵爾其勉之京東安撫使張琳皆來降以琳行山東東路益都滄景濱棣等州都元帥府事鄭遵亦以棗鄉舊縣降陞爲完州以遵爲節度使行元帥府事秋八月從駐青冢監國公主遣使來勞大饗將士由東勝渡河西夏國李王請以兵五萬屬焉冬十月復由雲中陞太和寨入護州金將王公佐遁以石天應權行臺兵馬都元帥進取綏德破馬蹄寨距延安三十里止舍金行省完顏合達出兵三萬陣于城東蒙古不花以騎三千覘之

馳報曰彼見吾兵少有輕敵心明日合戰當佯敗可
以伏兵取勝也從之夜半以大軍銜枚齊進伏於城
東十五里兩谷間明日蒙古不花進兵望見金兵即
棄鼓旗走金兵果追之伏發鼓聲震天地萬矢齊下
金兵大敗斬七千級獲馬八百合達走保延安圍之
旬日不下乃南徇洛川克鄜州北京權帥石天應擒
送金驍將張鐵槍木華黎責其不降厲聲荅曰我受
金朝厚恩二十餘年今事至此有死而已木華黎義
之欲解其縛諸將怒其不屈竟殺之遂降坊州大饗
士卒聞金復取隰州以軒成爲經畧使於是復由丹
州渡河圍隰克之留合丑統蒙古軍鎮石隰間以田
雄權元帥府事壬午秋七月令蒙古不花引兵出秦
隴以張聲勢視山川險夷大兵道雲中攻下孟州四
蹄寨遷其民于州拔晉陽義和寨進克三清巖入霍
邑山堡遷其人於趙城縣薄青龍堡金平陽公胡天
祚拒守裨將蒲察定住監軍王和開壁降遷天祚于
平陽八月有星書見隱士喬靜真曰今觀天象未可
征進木華黎曰主上命我平定中原今河北雖平而
河南秦鞏未下若因天象而不進兵天下何時而定
耶且違君命得爲忠乎冬十月過晉至絳拔榮州胡

魏堡所至望風歸附河中久爲金有至是復來歸木
華黎召石天應謂曰蒲爲河東要害我擇守者非君
不可乃以天應權河東南北路陝右關西行臺平陽
李守忠太原攸哈刺拔都隰州田雄並受節制命天
應造浮梁以濟歸師乃渡河按同州下蒲城徑趨長
安金京兆行省完顏合達擁兵二十萬固守不下乃
分麾下兀胡乃太不花兵六千屯守之遣按赤將兵
三千斷潼關遂西擊鳳翔旬餘不下謂諸將曰吾奉
命專征不數年取遼西遼東山東河北不勞餘力前
攻天平延安今攻鳳翔皆不下豈吾命將盡耶乃駐
兵渭水南遣蒙古不花南越牛嶺關徇宋鳳州而還
時中條山賊侯七等聚衆十餘萬伺大兵既西謀襲
河中石天應遣別將吳權府引兵五百夜出東門伏
兩谷間戒之曰侯賊過半急擊之我出其前爾攻其
後可克也吳權府醉酒失期天應戰死城陷賊燒燬
廬舍殺掠人民還走中條先鋒元帥按察兒邀擊敗
之斬數萬級侯七復遁去木華黎以天應子幹可襲
領其衆癸未春師還浮梁未成願諸將曰橋未畢工
安可坐待乎復攻下河西堡寨十餘三月渡河還聞
喜縣疾篤召其弟帶孫曰我爲國家助成大業擐甲

執銳垂四十年東征西討無復遺恨茅恨汴京未下耳汝其勉之薨年五十四厥後太祖親攻鳳翔謂諸將曰使木華黎在朕不親至此矣至治元年詔封孔溫窟哇推忠效節保大佐運功臣大師開府儀同三司上柱國魯國王謚忠宣木華黎體仁開國輔世佐命功臣大師開府儀同三司上柱國魯國王謚忠武子李魯嗣

李魯沈毅魁傑寬厚愛人通諸國語善騎射年二十七入朝行在所時太祖在西域夏國主李王陰結外後蓄異圖密詔李魯討之甲申秋九月攻銀州克之

斬首數萬級獲生口馬駝牛羊數十萬俘監府塔海命都元帥蒙古不華將兵守其要害而還乙酉春復朝行在所同知真定府事武仙叛殺都元帥史天倪脅居民遁于雙門寨仙弟質於軍中挈家逃歸遣撒寒追及於紫金關斬之命天倪弟天澤代領帥府事丙戌夏詔封功臣戶口爲食邑曰十投下李魯居其首宋將李全陷益都執元帥張琳送楚州秋九月郡王帶孫率兵圍全于益都冬十二月李魯引兵入齊先遣李喜孫招諭全全欲降部將田世榮等不從殺喜孫丁亥春三月全突圍欲走邀擊大敗之斬首七

千餘級自相蹂踐溺死不可勝計夏四月城中食盡全降諸將皆曰全勢窮出降非心服也今若不誅後必為患孛魯曰不然誅一人易耳山東未降者尚多全素得人心殺之不足以立威徒失民望表聞詔孛魯便宜處之乃以全為山東淮南楚州行省鄭衍德田世榮副之郡縣聞風款附山東悉平時滕州尚為金守諸將或言炎暑未可進攻孛魯曰主上親督大軍平定西域數年未聞當暑不戰我等安敢自逸乎遂促進兵金兵出戰敗之斬三千餘級其餘老幼開門出降以州屬石天祿俾先鋒元帥蕭乃台統蒙古

軍屯濟交課課不花以兵三千屯濰沂莒以備宋千戶按禮統大軍駐河北脩金九月師還至燕獵于昌平民持牛酒以獻卻之及還賜館人銀數百兩聞太祖崩趨赴北庭哀毀溝疾戊子夏五月薨年三十二至治元年詔封純誠開濟保德輔運功臣太師開府儀同三司上柱國魯國王謚忠定子七人長塔思次速渾察次霸都魯次伯亦難次野茂干次野不干次阿里乞失

塔思一名查剌溫幼與常兒異英才大畧綽有祖風木華黎常曰成吾志必此兒也及長每語必先忠孝

曰大丈夫受天子厚恩當效死行陣間以圖報稱安能委靡苟且目前以隳先世勲業哉年十八襲爵遂至雲中庚寅秋九月叛將武仙圍潞州太宗命塔思救之仙聞之退軍十餘里大兵未至塔思率十餘騎覘賊形勢仙恐有伏不敢犯塔思曰日暮矣待明日擊之是夜五鼓金將移刺蒲瓦來襲我師與戰不利退守沁南賊還攻潞州城陷主將任存死之冬十月帝親征遣萬戶因只吉台與塔思復取潞州仙夜遁邀擊之斬首七千餘級以任存姪代領其衆十一月帝攻鳳翔命塔思守潼關以備金兵河中自石天應死

復爲金有辛卯帝親攻拔之金元帥完顏火燎遁塔思追斬之壬辰春睿宗與金兵相拒于汝漢間金步騎二十萬帝命塔思與親王按赤台口溫不花合軍先進渡河以爲聲援至三峯山與睿宗兵合金兵成列將戰會大雪分兵四出塔思冒矢石先挫其鋒諸軍繼進大敗金兵擒移刺蒲瓦完顏合達單騎走鈞州追斬之遂拔鈞州三月帝北還詔塔思與忽都虎統兵畧定河南諸郡皆降惟汴京歸德蔡州未下塔思遣使請曰臣之祖父佐興大業累著勲伐臣襲世爵曾無寸效去歲復失利上黨罪當萬死願分攻汴

城一隅以報陛下帝壯其言命卜之不利乃止癸巳秋九月從定宗于潛邸東征擒金咸平宣撫完顏萬奴于遼東萬奴自乙亥歲率衆保東海至是平之甲午秋七月朝行在所時諸王大會帝顧塔思曰先皇帝肇開大業垂四十年今中原西夏高麗回鶻諸國皆已臣附惟東南一隅尚阻聲教朕欲躬行天討卿等以爲何如群臣未對塔思對曰臣家累世受恩圖報萬一正在今日臣雖駑鈍願伏天威掃清淮浙何勞大駕親臨不測之地哉帝悅曰塔思雖年少英風美績簡在朕心終能成我家大事矣賜黃金甲玻瓈帶及良弓二十命與王子曲出總軍南征乙未冬拔棗陽曲出別徇襄鄧塔思引兵攻郢郢瀕漢江城堅兵精且多戰艦塔思命造木筏遣汶上達魯花赤劉拔都兒將死士五百乘筏進擊引騎兵沿岸迎射大破之溺死者過半餘皆走郢壁堅不能下俘生口馬牛數萬而還丙申冬十月復出鄧州遂至蘄黃鄆州遣使獻金帛牛馬犒師請曰宋小國也進貢大朝有年矣惟王以生靈爲念乃捨之遂進拔符鎮六安縣焦家寨丁酉秋九月申八柳渡河入汴京守臣劉甫置酒大慶殿塔思曰此故金主所居我人臣也不可

處此遂宴於甫家冬十月復與口温不花攻光州主將黃舜卿降口温不花別畧黃州塔思攻大蘇山斬首數千級獲生口牛馬以千數戊戌春正月至安慶府官民皆遁于江東至北峽關宋汪統制率兵三千降遷之尉氏三月朝行在所秋九月帝宴群臣于行宮塔思大醉帝語侍臣曰塔思神已逝矣其能久乎冬十二月還雲中己亥春三月薨年二十八子碩篤兒幼弟速渾察襲碩篤兒既長詔別賜民三千戶爲食邑得建國王旗幟降五品印一七品印二付其家臣置官屬如列侯故事碩篤兒薨子忽都華襲忽都

華薨子忽都帖木兒襲忽都帖木兒薨子寶哥襲寶哥薨子道童襲

速渾察性嚴厲賞罰明信人莫敢犯與兄塔思從太宗攻鳳翔有功將兵抵潼關與金人戰屢捷既滅金皇子闊出攻宋棗陽入郢速渾察皆與焉歲己亥塔思薨速渾察襲爵即上京之西阿兒查禿置營總中都行省蒙古漢軍凡他行省監鎮事必先白之定其可否而後上聞帝嘗遣使至見其威容凜然侗儻有奇氣所部軍士紀綱整肅還朝以告帝曰真木華黎家兒也他國使有至者每見皆倉皇失次不能措辭

元史列傳卷六
必慰撫良父始得盡其所欲言左右或諫曰諸王百
司既莫敢越而復示之以威使人怖畏盍少加寬恕
以待之速渾察曰爾言誠是也然時有不同寬猛各
有所宜施天下初附民心未安萬一守者自縱事變
忽起悔之晚矣尋薨延祐三年贈宣忠同德翊運功
臣太師開府儀同三司上柱國追封爲東平郡王謚
忠宣子四人曰忽林池襲王爵曰乃燕曰相威曰撒
蠻相威自有傳

乃燕性謙和好學以賢能稱速渾察既薨憲宗擇於
諸子命乃燕襲爵乃燕力辭曰臣有兄忽林池當襲

帝曰朕知之然柔弱不能勝忽林池亦固讓乃燕頓
首涕泣力辭不得命既而曰若然則王爵必不敢受
願代臣兄行軍國之事於是忽林池襲爲國王事無
巨細必與乃燕謀議剖決精當無所擁滯世祖在潛藩
常與論事乃燕敷陳大義又明習典故世祖謂左右
曰乃燕後必可大用因號之曰薛禪猶華言大賢也
乃燕雖居顯要而小心謹畏每誨群從子弟曰先世
從太祖皇帝出入矢石間被堅執銳斬將搃旗勤勞
四十餘年遂成功名以故一家蒙恩深厚可謂極矣
慎勿驕惰以墮先王之名爾曹戒之病卒世祖聞之

爲之悲悼至正八年贈中奉大夫遼陽等處行中書省參知政事護軍追封魯郡公子二人曰碩德曰伯顏察兒碩德通敏有幹才世祖即位入宿衛典朝儀後同知通政院事嘗言遼東幹拙吉烈滅二種民數爲寇宜遣近臣諭之帝方難其人僉曰惟碩德元勲世胄可使帝深然之以問碩德對曰先臣從太祖皇帝定天下不辭險艱以立勲業陛下不以臣年少愚戇願請行帝大喜賜御衣錫燕以行碩德至集諸萬戶陳兵衝要詰其渠魁誅之脅從者皆降帝大悅嘗贊有差後從征乃顏及使西域屢建殊勲卒贈推忠

宣惠寧遠功臣謚忠敏加贈資善大夫嶺北等處行中書省右丞上護軍追封魯郡公

霸突魯從世祖征伐爲先鋒元帥累立戰功世祖在潛邸從容語霸突魯曰今天下稍定我欲勸主上駐驛回鶻以休兵息民何如對曰幽燕之地龍蟠虎踞形勢雄偉南控江淮北連朔漠且天子必居中以受四方朝覲大王果欲經營天下駐驛之所非燕不可世祖憮然曰非卿言我幾失之己未秋命霸突魯率諸軍由蔡伐宋且移檄諭宋沿邊諸將遂與世祖兵合而南五戰皆捷遂渡大江傳于鄂會憲宗崩于蜀

阿里不哥構亂和林世祖其還留霸突魯總軍務以待命世祖至開平即位還定都于燕嘗曰朕居此以臨天下霸突魯之力也師還中統二年卒于軍大德八年追贈推誠宣力翊衛功臣太師開府儀同三司上柱國東平王謚武靖夫人帖木倫昭睿順聖皇后同母兄也子四人長安童次定童次霸都虎台他姬子曰和童襲國王安童別有傳

塔塔兒台孔溫窟哇第三子帶孫郡王之後父曰忙哥從憲宗征伐累立戰功歲己未攻合州會憲宗崩命塔塔兒台護靈駕赴北會阿里不哥叛拘留數日逃歸追騎執以北還將殺之親王阿速台玉龍塔思曰塔塔兒台乃太師國王之裔不可殺也遂獲免至元元年從阿速台來歸世祖嘉之授懷遠大將軍佩金虎符世襲東平達魯花赤命宿衛士四十人給驛送之官所莅官一紀鎮靜不擾鄆人賴之以安卒年四十二子四人只必幼嗜讀書習翰墨至元十四年監東平官少中大夫多善政以清白稱嘗出家歲書二千餘卷置東平廟學使學徒講肄之尋授嘉議大夫江南湖北道提刑按察使改浙西大德四年入覲賜金段十匹明年春卒年五十一子三人皆早喪自

只必除按察使第秃不申嗣其職秃不申性淳靖喜怒不形知民疾苦而能以善道之旱嘗致禱即兩歲饑請於朝發廩以賑之睦同僚興學校加太中大夫士民刻石紀其政績云卒年五十一子五人長不老赤次塔實脫因次阿魯灰次完者不花次留住馬皆以次嗣爲東平達魯花赤

脫脫祖嗣國王速渾察沈深有智畧嘗奉命征討所向克捷父撒蠻幼穎異自襁褓時世祖撫育之若子嘗挾之南征同舟濟大江雪其有失繫之御榻及長常侍左右帝嘗詔之曰男女異路古制也况掖庭乎

禮不可不肅汝其司之旣而近臣孛羅衛命遽出行失其次撒蠻怒其違禮執而囚之別室帝恠其久不至詢知其故命釋其罪撒蠻因進曰令自陛下出陛下乃自違之何以責臣下乎帝曰卿言誠是也由是有意大任之會以疾卒不果年僅一十有七脫脫幼旣失怙其母孛羅海篤意教之孜孜若恐不及稍長直宿衛世祖復親誨導尤以嗜酒爲戒旣冠儀觀甚偉喜與儒士語每聞一善言善行若獲拱璧終身識之不忘至元二十四年從征乃顏帝駐驛於山巔旌旗蔽野鼓未作候者報有隙可乘脫脫即擐甲率家

奴數十人疾馳擊之衆皆披靡不敢前帝望見之大
加嗟賞遣使者勞之且召還曰卿勿輕進此寇易擒
也視其力已折馬已中箭矣帝顧謂近臣曰撒蠻不
幸早死脫脫幼朕撫而教之常恐其不立今能如此
撒蠻可謂有子矣遂親解佩刀及所乘馬賜之由是
深加器重得預聞機密之事其後哈丹復爲亂成宗
時在潛邸督師徃征之脫脫引衆率先躍馬感之其
衆大潰脫脫馬陷于淖泥中哈丹兵復進挑戰脫脫
弟阿老瓦丁奮戈衝擊遂大敗之成宗即位其寵顧
爲尤篤常侍禁闥出入惟謹退語家人曰我昔親承
先帝訓飭令毋嗜飲今未能絕也豈有爲人知過而
不能改者乎自今以往家人有以酒至吾前者即痛
懲之帝聞之喜曰扎剌兒台如脫脫者無幾今能剛
制于酒真可大用矣即拜資德大夫上都留守通政
院使虎賁衛親軍都指揮使政令嚴肅克修其職三
年朝議以江浙行省地大人衆非世臣有重望者不
足以鎮之進拜榮祿大夫江浙等處行中書省平章
政事有旨命中書祖道都門外以餞之始至嚴飭左
右毋預公家事且戒其掾屬曰僕從有私囑者慎勿
聽若軍民諸事有關於利害者則言之當言而不言

爾之責也言而不聽我之咎也聞者爲之悚慄時朱清張瑄以海運之故致位叅知政事恃其勢位多行不法恐事覺以黃金五十兩珠三囊賂脫脫求蔽其罪脫脫大怒繫之有司遣使者以聞帝喜曰脫脫我家老臣之子孫其志固宜與衆人殊賜內府黃金五十兩命回使寵賚之有豪民白晝殺人者脫脫立命有司按法誅之自是豪猾屏息民賴以安帝以浙民相安之乂未及召還大德十一年卒于位年四十四子朶兒只別有傳

博爾朮

博爾朮阿兒剌氏始祖孛端察兒以才武雄朔方父納忽阿兒闡與烈祖神元皇帝接境敦睦隣好博爾朮志意沉雄善戰知兵事太祖於潛邸共履艱危義均同氣征伐四出無往不從時諸部未寧博爾朮每警夜帝寢必安枕寓直於內語及政要或至達旦君臣之契猶魚水也初朮兒斤部卒盜牧馬博爾朮與往追之時年十三知衆寡不敵乃出奇從旁夾擊之盜舍所掠去及戰于大赤兀里兩軍相接下令殊死戰跬步勿退博爾朮繫馬於腰蹠而引滿分寸不離故處太祖嘉其勇膽乂嘗潰圍於怯列太祖失馬博

爾木擁帝累騎而馳頓止中野會天雨雪失牙帳所
在卧草澤中與木華黎張璁表以蔽帝通夕植立足
蹟不移及旦雪深數尺遂免於難篋里期之戰亦以
風雪迷陣再入敵中求太祖不見急趨輜重則帝已
還卧憇車中聞博爾木至曰此天贊我也丙寅歲太
祖即皇帝位君臣之分益中言從容謂博爾木及木
華黎曰今國內平定多汝之力我之與汝猶車之
有轅身之有臂汝等宜體力皆遂以博爾木及木
華黎為左右萬戶各以衛位在諸將上皇子
察哈牙出鎮西域有旨亦受教博爾木教以

人生經涉險阻必獲善地所過無輕舍止太祖謂皇
子曰朕之教汝亦不踰是未幾賜廣平路戶二萬七
千三百有奇為分地以老病薨太祖痛悼之大德五
年贈推忠協謀佐運功臣大師開府儀同三司追封
廣平王謚武忠子孛藥台襲爵萬戶贈推誠宣力保
順功臣太師開府儀同三司追封廣平王謚忠定孫
玉昔帖木兒

玉昔帖木兒世祖時嘗寵以不名賜號月呂魯那演猶
華言能官也弱冠襲爵統按台部衆器量宏遠莫測其
際世祖聞其賢驛召赴闕見其風骨厖厚解御服銀貂

賜之時重太官內膳之選特命領其事侍宴內殿玉
昔帖木兒起行酒詔諸王妃皆爲答禮至元十二年
拜御史大夫時江南既定益封功臣後遂賜全州清
湘縣戶爲分地其中臺務振宏綱弗親細故興利
之臣欲援金舊制併憲司入漕府當政者又請以郡
府之吏互照憲司檢底玉昔帖木兒曰風憲所以戢
奸若是有傷監臨之體其議乃沮遇事廷辯吐辭鯁
直世祖每爲之霽威至元二十四年宗王乃顏叛東
鄙世祖躬行天討命總戎者先之世祖至半道玉昔
帖木兒已退敵僵尸覆野數旬之間三戰三捷獲乃

顏以獻詔選乘輿索駝百蹄勞之謝曰天威所臨猶
風偃草臣何力之有世祖還留玉昔帖木兒勦其餘
黨乃執其酋金家奴以獻戮其同惡數人於軍前明
年乃顏之遺孽哈丹秃魯干復叛再命出師兩與之
遇皆敗之追及兩河其衆大斲遂遁時已盛冬聲言
侯春方進乃倍道無行過黑龍江擣其巢穴殺戮殆
盡哈丹秃魯干莫知所終夷其城撫其民而還詔賜
內府七寶冠帶以旌之加大傅開府儀同三司事命
禦邊杭海二十九年加錄軍國重事知樞密院事宗
王帥臣咸稟命焉特賜步輦入內位望之崇廷臣無

出其右三十年成宗以皇孫撫軍北邊玉昔帖木兒
輔行請授皇孫以儲闡舊璽詔從之三十一年世祖
崩皇孫南還宗室諸王會于上都定策之際玉昔帖
木兒起謂晉王甘麻剌曰宮車晏駕已踰三月神器
不可久虛宗祧不可乏王疇昔儲闡符璽既有所歸
王為宗盟之長奚俟而不言甘麻剌遽曰皇帝踐祚願
北面事之於是宗親大臣合辭勸進玉昔帖木兒復
坐曰大事已定吾死且無憾皇孫遂即位進秩太師
賜以尚方玉帶寶服還鎮北邊元貞元年冬議邊事
入朝兩宮錫宴如家人禮賜其事禿忽魯宴服及他

珍寶十一月以疾薨大德五年詔贈宣忠同德弼亮
功臣依前太師開府儀同三司錄軍國重事御史大
夫追封廣平王謚曰貞憲子三人木剌忽仍襲爵為
萬戶次脫憐次脫脫哈為御史大夫

博爾忽

博爾忽許兀慎氏事太祖為第一千戶歿於敵子脫
歡襲職從憲宗四征不庭有拓地功子失里門鎮徼
外從征六詔葺城亦歿于兵子月赤察兒性仁厚勤
儉事母以孝聞資貌英偉望之如神世祖雅聞其賢
且閔其父之死年十六召見帝見其容止端重奏對

詳明喜而謂曰失烈門有子矣即命領四怯薛太官
至元十七年長一怯薛明年詔曰月赤察兒秉心忠
實執事敬慎知無不言言無不盡曉暢朝章言輒稱
旨不可以其年少而弗陞其官可代線真為宣徽使
二十六年帝討叛者于杭海衆皆陣月赤察兒奏曰
丞相安童伯顏御史大夫月呂祿皆已受命征戰三
人者臣不可以後之今勅賊逆命敢禦天戈惟陛下
憐臣使臣一戰帝曰乃祖博爾忽佐我太祖無征不
在無戰不克其功大矣卿以為安童輩與爾家同功
一體各立戰功自耻不逮然親屬素察鞬恭衛朝夕爾

功非小何必身踐行伍手事斬馘乃快爾心耶二十
七年察哥既立尚書省殺異己者箝天下口以刑爵
為貨既而紀綱大紊尚書平章政事也速答兒太官
屬也潛以其事白月赤察兒請奏劾之察哥伏誅帝
曰月赤察兒口伐大姦發其蒙蔽乃以沒入察哥黃
金四百兩白金三千五百兩及水田水磴別墅賞其
清彊察哥既敗帝以湖廣行省西連番洞諸蠻南接
交趾島夷延袤數千里其間土沃人稠會丁溪子善
驚好鬪思得賢方伯往撫安之月赤察兒舉哈刺哈
孫答刺罕以為行省平章政事凡八年威德交孚洽

于海外入爲丞相天下稱賢世以月赤察兒爲知人
二十八年都水使者請鑿渠西導白浮諸水經都城
中東入潞河則江淮之舟既達廣濟渠可直泊於都
城之匯帝亟欲其成又不欲役其細民敕四怯薛人
及諸府人專其役度其高深畫地分賦之刻日使畢
工月赤察兒率其屬著役者服操畚鍤即所賦以倡
趨者雲集依刻而渠成賜名曰通惠河公私便之帝
語近臣曰是渠非月赤察兒身率衆手成不速也成
宗即位制日月赤察兒盡其誠力深其謀議抒忠於
國流惠於人可加開府儀同三司太保錄軍國重

樞密宣徽使大德四年拜太師初金山南北叛王海
都篤娃據之不奉正朔垂五十年時入爲寇嘗命親
王統左右部宗王諸帥屯列大軍脩其衝突五年朝
議北師少怠紀律不嚴命月赤察兒副晉王以督之
是年海都篤娃入寇大軍分爲五隊月赤察兒將其
一鋒旣交頗不利月赤察兒怒被甲持矛身先陷陣
一軍隨之出敵之背五軍合擊大敗之海都篤娃遁
去月赤察兒亦罷兵歸鎮厥後篤娃來請臣附時武
宗亦在軍月赤察兒遣使詣武宗及諸王將帥議曰
篤娃請降爲我大利固當待命於上然往返再閱月

必失事機事機一失爲國大患人民困於轉輸將士
疲於討伐無有已時矣薦娃之妻我弟馬兀合刺之
妹也宜遣使報之許其臣附衆議皆以爲允既遣始
以事聞帝曰月赤察兒深識機宜既而馬兀合刺復
命由是叛人稍稍來歸十年冬叛王滅里鐵木兒等
屯于金山武宗帥師出其不意先踰金山月赤察兒以
諸軍繼往壓之以威啖之以利滅里鐵木兒乃降其
部人驚潰月赤察兒遣秃蒲鐵木兒察忽將萬人深
入其部人亦降察兒兄者海都長子也海都死嗣領
其衆至是掩取其部人凡兩部十餘萬口至大元年

月赤察兒遣使奏曰諸王秃苦滅本懷攜貳而察兒
兒游兵近境叛黨素無悛心倘合謀致死則垂成之
功顧爲國患臣以爲昔者薦娃先衆請和雖死宜遣
使安撫其子款徹使不我異又諸部既已歸明我之
牧地不足宜處諸降人於金山之陽吾軍屯田金山
之北軍食既饒又成重成就彼有謀吾已擣其腹心
矣奏入帝曰是謀甚善卿宜移軍阿荅罕三撒海地
月赤察兒既移軍察兒秃苦滅果欲奔款徹不見
納去留無所遂相率來降於是北邊始寧帝詔月赤
察兒曰卿之先世佐我祖宗常爲大將攻城戰野功

烈甚著卿乃國之元老宣忠底績靖謚中外朕入繼
大統卿之謀猷居多今立和林等處行中書省以卿
爲右丞相依前太師錄軍國重事特封淇陽王佩黃
金印宗藩將領實瞻卿麾進退其益懋乃德悉乃心
力毋替所服四年月赤察兒入朝帝宴于大明殿春
禮優渥尋以疾薨于第詔贈宣忠安遠佐運弼亮功
臣謚忠武


塔察兒一名倂蓋居官山伯祖父博爾忽從太祖起朔
方直宿衛爲火兒赤火兒赤者佩橐鞬侍左右者也由
是子孫世其職博爾忽從太祖平諸國宣力爲多當時

與木華黎等俱以功號四傑塔察兒其從孫也驍勇
善戰幼直宿衛太祖平燕睿宗監國聞燕京盜賊恣
意殘殺直指富庶之家載運其物有司不能禁乃遣
塔察兒耶律楚材窮治其黨誅首惡十有六人由是
巨盜屏迹太宗伐金塔察兒從師拔行省兵馬都元
帥分宿衛與諸王軍士俾統之下河東諸州郡濟河
破潼關取陝洛辛卯從圍河中府拔之壬辰從渡白
坡時睿宗已自西和州入興元由武關出唐鄧太宗
以睿宗與金兵相持久乃遣使約期會兵合進即詔
發諸軍至鈞州連日大雪睿宗與金人戰于三峯山

大破之詔搭察兒等進圍汴城金主即以兄子曹王
訛可為質太宗與睿宗還河北搭察兒復與金兵戰
于南薰門癸巳金主遷蔡州搭察兒復帥師圍蔡甲
午滅金遂留鎮撫中原分兵屯大河之上以遏宋兵
丙申破宋光息諸州事聞于朝以息州軍民一千戶
賜之戊戌卒子別里虎解嗣為火兒赤憲宗即位歲
壬子襲父職總管四萬戶蒙古漢軍攻宋兩淮悉定
邊地戊午會師圍宋襄陽逼樊城力戰死之次曰宋
都斛至元七年賜金虎符襲蒙古軍萬戶八年悉兵
再攻襄陽圍樊城進戰鄆岳漢陽江陵歸峽諸州皆
有功十二年加昭毅大將軍受詔為隆興出征都元
帥與李恒等長驅而宋人莫當其鋒戰勝攻取望風
迎降盡平江西十一城又徇嶺南廣東宋亡還師未
及論功卒

2443 1.2

列傳卷第六



H956.2
3030

